

## HEŞT BEHİŞT

Bi'smi'llâhi'r-Rahmâni'r-Rahîm

*Mefâ'ilün Mefâ'ilün Fa'ûlün*

- 1 Bi-hamdi'llâh hâdî külli hâmid  
Lenâ tevîkihi aksâ'l-makâsîd
- 2 Ezelden vasf-ı zâtıdur anuñ cûd  
Rızâsıdur iki 'âlemde maksûd
- 3 Mukaddesdür kemâlâtında zâtı  
Müberrâdur nakâyısdan sıfâtı
- 4 Kemâli çeşmesârına cihân bîd  
Cemâli nûrına bir zerre hurşîd
- 5 Nukûş-ı safha-i ekvâna nakkâş  
Hatâ erbâbı üstine 'atâ-pâş
- 6 Kemâl-i kudreti gün gibi zâhir  
Nakâyısdan münezzeh zâtı tâhir
- 7 Güneş kim rûşenâ-bahş-ı kamerdür  
Anuñ envâr-ı cûdından eserdür
- 8 Cemî'-i mâ-sivânuñ hâlıkıdur  
Şebistân içre subhuñ fâlıkıdur
- 9 Degül mümkün ire künhine idrâk  
Bu ma'nâ şâhididür "mâ 'arefnâk"
- 10 Bir avuç hâke virdi hüsn-i takvîm  
Melâ'ikden şerefde kıldı takdîm
- 11 Salup nefha cihâna lutfi bâdı  
'Urûc itdürdi 'arşa hâk-zâdı
- 12 Sa'âdet aña olmışdur müyesser  
Ki oldı dîde-i lutfına manzar
- 13 Musahhar eyledi tûfânı Nûha  
Beden kıldı hisâr-ı çarhı rûha
- 14 Cihân fahrın yetîm evvel ol itdi

Nitekim Mısır sultânın kul itdi

- 15 Halîle nârı ol itdi gülistân  
Ol ihsân itdi İsmâ'île kurbân
- 16 Bize bildürmek içün 'adl ü dâdın  
Havâle kıldı 'Âda kahrı bâdın
- 17 Olup rûy-ı seffidi esvedü'l-levn  
Anuñ mekriyle girdi Nîle Fir'avn
- 18 Egerçi âlet ü esbâbı çokdur  
Velî olmaz ise noksânı yokdur
- 19 Yirine urmaga tîrin nişânuñ  
Yiter kâfı ile nûnı kemânuñ
- 20 Yaratdı kâf u nûn ile cihânı  
Kemâlâtına mazhar kıldı anı
- 21 Kaçan olsa havâle dest-i kahrı  
Megesden dûn ider sultân-ı dehri
- 22 İrişür feyz-i cûdı bahr ü bere  
Bilür mâ-fi'z-zamîri zerre zerre
- 23 'Înâyetle kime itse nazarlar  
Dilinde mahv olur havf u hatarlar
- 24 İçüp 'ışkı elinden cur'a-i cûd  
Olupdur mest-i hayret cümle mevcûd
- 25 Şu kim 'ışkında kılmaz sînesin def  
Asılmak oldu gûşında[n] muzâ'af
- 26 Niçe sûretten itmişdür tecellî  
Vire 'âşıklara tâ kim tesellî
- 27 Şu sultânsın ki ey Sübbûh u Kuddûs  
İşigüñde gerekmez 'âr u nâmûs
- 28 Komagı âsitânuñ hâkine ser  
Ulu 'izzet bilür Nâmûs-ı Ekber
- 29 Alaylar baglayup her dem kapuñda  
Turur tâvûs-ı kudsîler tapuñda
- 30 İder fermânuña her şey' tevakkuf  
Senüñdür iki 'âlemde tasarruf

- 31 Ne bâtin çıkdı mülküñden ne zâhir  
Senüñdür her ne kim var evvel âhir
- 32 Cihân emre musahhar çâkerüñdür  
Zemîn ü âsumân fermân-berüñdür
- 33 Güneş emrüñsüz olmaz ‘âlem-efrûz  
Şebistân zulmetin def` eylemez rûz
- 34 Kamer ardına düşüp her Sitâre  
Senüñ emrüñle olur pâre pâre
- 35 Cihân kim ‘arş u ferş u bahr u berdür  
Kemâl-i kudretüñden bir eserdür
- 36 İki harf ile itseñ bir işâret  
İrür ma‘dûma varlıkdan beşâret
- 37 Bahâr oldukça hârı gül idersin  
Şitâ irse dırahtı kül idersin
- 38 Dem-i kahruñ zer ü sîmi ider mis  
Nem-i lutfuñ kuru hâki nefâyis
- 39 Cihâna münteşir in‘âm u cûduñ  
İşigüñ kıblesidür her sücûduñ
- 40 Kapuñ hâkiyle çeşmin itmege pür  
İder merd-i basîr olan tahassür
- 41 Kim ola vasf-ı zâtuñdan ura kâl  
Sıfâtuñda zebân-ı nâtıka lâl
- 42 Eger olsa senüñ emrüñle yâ Rab  
Agaçlar hâme deryâlar mürekkeb
- 43 Varaklar olsa hem etbâk-ı eflâk  
Debîr olsa halâyık cüst ü çâlâk
- 44 Yazılsa haşre dek feyzüñ beyânı  
‘İyânından biñ artukdur nihânı
- 45 N’ola raks eylesek şevk ü tarabdan  
Ki olmuş rahmetüñ esbak gazabdan
- 46 Eger senden ümîd itmezse ihsân  
Neye yarar dahı ‘âlemde insân
- 47 Beni ey mufzıl-ı feyyâz-ı zi’l-cûd  
Kamu a‘dâma kıl fazluñla mahsûd

- 48 Kapuñıa varmaga aslâ yüzüm yok  
İşigüñ hâkine lâıık gözüm yok
- 49 Sücûdumla rükû‘um ‘ayn-ı noksân  
Bilüm dâl eylemişdür fıkır-i ‘isyân
- 50 Eger olmazsa dîdâruñla hurrem  
Behiştîye olur cennet cehennem
- 51 Ne deñlü çoğ ise cürm ü günâhı  
Anı ‘afv eyle fazluñla İlâhî
- 52 Cesed âlûdedür ammâ gönül pâk  
Koma bî-çâreyi hayretde gamnâk
- 53 Senâ itse saña bir merd-i sâñî  
Olurum ben dahı her yirde sâñî
- 54 Velî ilhâm ile bildüm bu râyı  
İder yokdur saña lâıık senâyı
- 55 Senâ bezminde alup deste ‘ûdı  
Neyem ben kim idem anda sürûdı
- 56 Şu kim ehl-i senâya reh-nümâdur  
Senâsı saña “lâ-uhsâ” senâdur

#### **Der-Beyân-ı Na‘t-i Hazret-i Habîb-i Hudâ**

- 57 Habîb-i Hak tabîb-i nesl-i Âdem  
Vücûdınıñ tufeyli oldu ‘âlem
- 58 Nebîlerden hem emlahdur hem efsah  
Habîb olmaga yokdur andan aslah
- 59 Yüzünüñ nûrı hurşîd ü kamerdür  
Gözüñüñ kuhlî “mâ zâga’l-basar”dur
- 60 Dil ü cân derdinüñ oldur hakîmi  
Nübüvvet bahrinüñ dürr-i yetîmi
- 61 Cebîni matla‘-ı envâr-ı Yezdân  
Cemâli gıbtâ-i hurşîd-i tâbân
- 62 Vücûduñ gevher-i kıymetveridür  
Vedûduñ sevgili peygamberidür
- 63 ‘İbâdet ‘arsasınıñ pâk tâzı  
Siyâdet pâyesinüñ ser-firâzı

- 64 Delîl olmaga ol hulk-ı ‘azîme  
İnüpdür niçe âyât-ı kerîme
- 65 Zirâ‘atgâh-ı İslâmuñ emîni  
Dü ‘âlem halkı anuñ hûşe-çîni
- 66 Dili âyîne-i sıdk u safâdur  
Ulular içre nâmı Mustafâdur
- 67 Gözi nûrîdur ehl-i asfîyânuñ  
Yüzi suydur erbâb-ı hayânuñ
- 68 Yüzi hayret zalâminuñ sirâcı  
Mübârek pâyı ‘arşuñ başı tâcı
- 69 Şehen-şâhı livâ-yı enbiyânuñ  
Kerâmet-bahşı hayl-i evliyânuñ
- 70 ‘İzârı “ve’d-duhâ” gîsûsı “ve’l-leyl”  
Zafer aña karavuldur melek hayl
- 71 Çün ol şâh eyledi ‘ukbâya refâtâr  
Mesîhâ ‘askerine oldı dündar
- 72 Felekler oldı mi‘râcına pâye  
Melekler muntazırdur merhabâya
- 73 İki ‘âlemde anuñdur sa‘âdet  
Zafer dünyâda mahşerde şefâ‘at
- 74 Ne mülküñ fethine ‘azm itse ol şâh  
Aña reh-ber olur “nasrun min Allâh”
- 75 Hilâliyle anuñ hurşîd-i rahşân  
Murâdı ‘arsasında gûy u çevgân
- 76 Vücûdı hil‘at-ı “levlâk”e lâyıık  
Kulı kurbânıdur anuñ halâyık
- 77 Anuñ şevkiyle raks urur felekler  
Anuñ meddâhıdur gökde melekler
- 78 Aña olmag ile hem-râz u mahrem  
Tefahhurlar ider Cibrîl-i Ekrem
- 79 Seni ey gülbün-i Firdevs-i a‘lâ  
Yaratmış rahmetinden Hak Ta‘âlâ
- 80 Kudûmüñle siyâdet buldı sâdât

Hemân anlar degül belki cemâdât

- 81 Yoluñda itmek ile istikâmet  
Müyesser oldı serve kadd ü kâmet
- 82 Senüñ kaddüñ sanup sahn-ı çemende  
Sarıldı yâsemen serv-i bülende
- 83 Gelüp hâl-i ruhuñ şevkiyle vecde  
Benefşe itdi hâk üstine secde
- 84 Nedendür sünbüle bilmem bu tâli‘  
Ki bûy-ı mûyuñ andan oldı şâyî‘
- 85 Eger anuñ derinden olmasa gül  
Figân itmezdi karşusunda bülbül
- 86 Eger sen olmasañ çeşm ü çerâgı  
Urur mıydı derûna lâle dâgı
- 87 Sabâ olmasa ger saña hevâdâr  
Hevâyî diller olmazdı aña yâr
- 88 Vire Hak diyü a‘dâña belâlar  
Çenâr el kaldurup eyler du‘âlar
- 89 ‘Adûñı kılmaga kahr ile bî-cân  
Nihâl-i gül idindi hârı peykân
- 90 Öñüñde hâke düşsün diyü düşmen  
Eline tîg-i bürrân aldı süsen
- 91 Yumaga ‘asker-i küffârı kana  
Sular cevşen giyüp oldı revâne
- 92 ‘Aceb niçün sarardı geçdi nerges  
Meger oldı Behiştî gibi bî-kes
- 93 Anı bî-kes koma lutfuñ sened kıl  
Göz uciyla nazar eyle meded kıl
- 94 Derûndan saña olmışdur şehâ kul  
Şefâ‘atden niçün mahrûm ola ol
- 95 Zebânîler elinde koma yarın  
Behiştîñüñ cehennem itme dârın

#### **Der-Zikr-i Sahâbe-i Güzîn**

- 96 Hudâvendâ Habîbüñ hürmetiyçün

Anuñ izhâr-ı dîne ragbetiyçün

- 97 'Înâyet kıl 'umûman ümmetine  
Gerek yada gerek zürriyyetine
- 98 Şular kim her biri şeksüz velîdür  
Ebû Bekr ü 'Ömer 'Osmân 'Alîdür
- 99 Güşâde olsun anlaruñ nihâdı  
Belâ bendinden âzâd it 'ibâdı
- 100 Hüseyin ile Hasandur hayr-ı ecdâd  
Ki anlardan olupdur neşr-i evlâd
- 101 İkisi dahı ol dîn serverinüñ  
Dilerler ümmetini cedlerinüñ
- 102 Mukarrer sâ'ir ashâb-ı güzînüñ  
Ki anlar evvelidür âhirînüñ
- 103 Tutup her biri saña himmetini  
Diler senden Habîbüñ ümmetini
- 104 Dahı ezvâc-ı ethâruñ du'âsı  
Budur ki 'âm ola 'afvuñ salâsı
- 105 Zuhûr itdükde yâ Rab rûz-ı mahşer  
Nasîb it bunlara Rıdvân-ı Ekber
- 106 Benüm sen bu du'âmı müstecâb it  
Su'âl-i hasteye şâfi cevâb it
- 107 Hidâyet pâyesine eyle telkîn  
El açup sözüme kim dirse âmîn

**Münâcât-ı Kâdi'l-Hâcât**

- 108 İlâhî ber-kemâlâ Kirdigârâ  
Kerîmâ Kâdirâ Perverdîgârâ
- 109 Garîbem baña telkîn-i tarîk it  
Koma vahşetde tevîkûñ refîk it
- 110 Benüm yol sormaga gayra dilüm yok  
Revân olmaga bir semte bilüm yok
- 111 Tarîküm güm olup hayret ilinde  
Mededsüz kaldum emmâre elinde
- 112 Dirîgâ âh u vâveylâ vü feryâd

Ki 'ömrüm hâsılın nefs itdi ber-bâd

- 113 Cevânlık gaflet ile gitdi elden  
İrişdi pîrlık kaldum 'amelden
- 114 Görinmez gözüme bir âferîde  
Meger peydâ ola bir nûr-ı dîde
- 115 Direm bang-ı namâz itse ser-âgâz  
Sürûd-ı mutribe beñzer şu âvâz
- 116 Olur mescidde dil bend-i belâda  
Velî mey-hânede gülden güşâde
- 117 Kaçan mihrâbda itsem karârı  
Öñümde sanuram ebrû-yı yârı
- 118 Namâza kâ'im olsam virde câlis  
Derûn-ı sînem olur pür-vesâvis
- 119 Kımıldanmaz bu dil zikr ü du'âya  
Kanađ açar uçar ammâ hevâya
- 120 Ayagum şöyle almışdur zamâne  
Ser-encâmum degül kâbil beyâna
- 121 Göñül 'ilme 'amel zamm itmedüñ sen  
'Îlâc olmasa nef' olur mı tıbdan
- 122 Gamumdandur figânum sanma hayfâ  
Ki destümde ne 'ukbâ var ne dünyâ
- 123 Tekâsüldür dem-i tâ'atde hâlüm  
Gınâda göz yaşı mâl ü menâlüm
- 124 İtâ'at sandugum ma'nîde 'isyân  
Hakîkatde kemâlüm 'ayn-ı noksân
- 125 Velî yâ Rab tapuñdan var ümîdüm  
Ümîdümdür benüm dürr-i ferîdüm
- 126 Olursa pîşvâ lutfuñ İlâhî  
Umaram kim bulam maksûda râhı
- 127 Bilürem kalmazam dârü'l-fenâya  
Ecel ökçem basar mânend-i sâye
- 128 Koma hayret şebistânında güm-râh  
Bir ahter çeşmüme göster sehergâh



- 129 Ki ‘âlemde bu olmuşdur murâdum  
Müjem hâme gözüm yaşı midâdum
- 130 Koyam dünyâda bir garrâ risâle  
Hediye ola erbâb-ı kemâle
- 131 Mu‘în ol baña ilhâmuñ imâm it  
Ezelden olan in‘âmuñ tamâm it
- 132 Benüm bir gayra yokdur istinâdum  
Dü ‘âlemde sañadur i‘timâdum

**Matla‘**

- 133 Gel ey murg-ı sehergâh-ı sa‘âdet  
Terennüm vaktidür terk itme ‘âdet
- 134 Ma‘ârif gülşeninde nâle eyle  
Gözümüñ lâlesin pür-jâle eyle
- 135 Bizi itmez misin gül gibi handân  
Yiter sünbül gibi olduk perîşân
- 136 Bizi sen ber-murâd itmek gereksin  
Dil-i gamgîni şâd itmek gereksin
- 137 Geçer âhir zamân-ı nâ-müsâ‘id  
Türâba halt olur her sâk u sâ‘id
- 138 Lebûñ depret belâgatdan haber vir  
Dehân-ı tûtî-i câna şeker vir
- 139 Hikâyet başla ‘ışk âvâzesinden  
Dem ur eş‘âr-ı şûhuñ tâzesinden
- 140 Vücûduñ âhir-i kârı ‘ademdür  
Niçün hâmûş olursın dem bu demdür
- 141 Cihân-ı bî-bekâ dârü’l-fenâdur  
Gelen bunda belâya mübtelâdur
- 142 Gelen mülk-i vücûda âhir-i kâr  
İder mülk-i ‘ademden yaña reftâr
- 143 Akar su gibidür hâli zamânuñ  
Geçürme çağın ol âb-ı revânuñ
- 144 Bilenler didi ahvâl-i cihânı  
Ganîmet mâlıdur fırsat zamânı

- 145 Kemâl-i fazl ile nâdir olanlar  
Hüner göstermege kâdir olanlar
- 146 Cihândan eyledükde irtihâli  
Komamışlar bu menzilgâhı hâlî
- 147 Komış kimi eser ‘ilm ü ‘amelden  
Kimi nesr ü kimi nazm u gazelden
- 148 Kimi olmuş mecâz-ı sırfa mâ’îl  
Kimi yazmış hakikatde hamâ’îl
- 149 Gel imdi sen de mikdâruñ beyân it  
Eser vaz‘ eyle bir nev dâstân it
- 150 Cihânda bir gülistân eyle îcâd  
Semâ‘ı eylesün gamgînleri şâd
- 151 İdüp üstine anuñ sarf-ı himmet  
Sekiz bâb üzre kıl mânend-i cennet
- 152 Temâşâ eyleyen vaz‘-ı zarîfîn  
Behişt-i Heşt ide nâm-ı şerîfîn
- 153 Revân oldukda sen dârü’l-bekâyâ  
Kala bunda sebeb ola du‘âyâ

**Behişt-i Evvel Der-Beyân-ı İhlâs Fi’l-‘Amel**

- 154 İlâhu’l-halk sultânü’s-selâtîn  
Ki anuñdur bu evzâ‘ u bu âyîn
- 155 “Hüve’l-evvel” ki yokdur aña sâni  
“Hüve’l-âhir” ki fânîdür kalanı
- 156 “Hüve’z-zâhir” ki ekvân aña mazhar  
“Hüve’l-bâtın” ki ekvândan ganî-ter
- 157 Yaradup kudretiyle “kün fekân”ı  
Zirâ‘atgâh idüpdür bu cihânı
- 158 Beşer cinsin aña huddâm idüpdür  
Tarîk-i hidmeti i‘lâm idüpdür
- 159 Virüp tohm anlara hüsn-i ‘amelden  
Didi komañ bunı ölince elden
- 160 Ki bunuñ hâsılı makbûlı vardur  
Eken biçse gerek mahsûlı vardur

- 161    Bunuñ cennetdedür hüsn-i simârı  
      Tehî görme sakın bu kesb ü kârı
- 162    Ne lâzım biz vatan tutmak bu yurdı  
      Anı ütmek gerek kim Hak buyurdu
- 163    Fenâ bâzârıdur bu gûşe-i gam  
      Degül ser-mâyesi dînâr u dirhem
- 164    Eger var ise elde nakd-i tâ‘at  
      Senüñdür rûz-ı mahşerde sa‘âdet
- 165    Eger müflis be-kâr iseñ ‘amelde  
      Göresin hâlünüñ rûz-ı ecelde
- 166    Du‘âlarla vuzûnü eyle tâze  
      Hulûs ile şürû‘ eyle namâza
- 167    Çıkarup virdüğüñ vaktin zekâtı  
      Fakîre eyle hüsn-i iltifâtı
- 168    Oruc tutsañ sakın gıybet sözinden  
      Gözünüñ hem sakla nâ-mahrem yüzinden
- 169    Tavâf-ı Ka‘beye niyyet iderseñ  
      Safâ-yı hâtır ile git giderseñ
- 170    Senâlar eyle Allâha yoluñda  
      Fakîri gözle saguñda soluñda
- 171    Gücünüñce ihtimâm it sâlihâta  
      Eger ‘ilme eger savm u salâta
- 172    ‘Amel eyle ‘amel sözüñ söz olsun  
      Çog olmaz ise az olsun öz olsun
- 173    Eger ihlâs ile olursa tâ‘at  
      Senüñdür iki ‘âlemde sa‘âdet
- 174    ‘Amel kârını lâyık kıl İlâha  
      Ki kem nesne virilmez pâdişâha
- 175    Hemân sûret degüldür aña kâfi  
      Gerekdür tâ‘ate ihlâs-ı sâfi
- 176    ‘Amel âsân degüldür şânı vardur  
      Ki zer‘ünüñ vakt ile bâzârı vardur
- 177    Eger olsun dir iseñ tâ‘atünüñ hâs  
      Düriş kim tâze tutsun âb-ı ihlâs

- 178 Mürâ'înüñ şekâvetdür nasîbi  
Anı eyle dimişdür Hak Habîbi
- 179 Kıyâmetde zihî hüsrân u hasret  
Ki tâ'at olmaya makbûl-i Hazret
- 180 Fakîre nîm nân virseñ riyâsuz  
İrişür hasteñe sıhhat devâsuz
- 180 Tutarsañ gûşuñı ben hâk-i pâye  
Saña eyler kifâyet bu hikâye

### **Hikâye-i Matlûbe**

- 182 Yazar Keşşâf ile Tefsîr-i Kâzî  
Hudâ sâhiblerinden ola râzî
- 183 Müfessirler güzîni İbn 'Abbâs  
Rivâyet eyledi ol a'lem-i nâs
- 184 Vatandan hicret idüp Hak Resûli  
Medîne semtine tutmışdı yolu
- 185 Varup olmuşlar idi anda sâkin  
Müşerref olmuş idi ol emâkin
- 186 Hasanla Şîr-i Yezdânuñ Hüseyni  
Cihânuñ anlar iken zîb ü zeyni
- 187 İki bir ugurdan haste oldu  
İşidenler anı dem-beste oldu
- 188 Gül-i nev 'arz iderken deste deste  
Sarardı ol iki rûy-ı huceste
- 189 Kazâyile beñizcikler bozıldı  
Semenler soldı nergisler süzildi
- 190 Boyuncuklar miyân-veş oldu bârîk  
Güzel gözlerine dehr oldu târîk
- 191 Salınmakdan kalup serv-i çemânlar  
Yasıldı 'anberîn tozlu kemânlar
- 192 Dehânuñ rîk-i şîrîni olup mür  
Göze göstermez oldu hokkalar dür
- 193 Katı inceldi ol nâzûk bedenler  
'Adem vasfin ider oldu dehenler

- 194 Hilâl oldu iki bedr-i dücâlar  
Melâle düşdi yad u âşinâlar
- 195 Olup Şîr-i Hudâ bî-sabr u gamgîn  
Dökerdi dîdesinden eşk-i hûnîn
- 196 Gamından Fâtımâ ol hûr-ı cennet  
Olupdı garka-i deryâ-yı hayret
- 197 Aña bir câriye virmişdi Bârî  
Ki olmuşdı gam u şâdîde yârî
- 198 Egerçi Fıdda idi adı anuñ  
Bu ad ile olupdı yâdı anuñ
- 199 Velî anuñ dahı bu çâresüz derd  
Zeheb gibi iderdi beñzini zerd
- 200 Bunuñ üzre güzer kıldı niçe gün  
Olupdı bunlaruñ gamdan günü dün
- 201 İfâkat bulmadı ol nâzenînler  
Cihânı kapladı âh u enînler
- 202 Cihân fahrı işitdi ol belâyı  
Göre vardı ol iki mübtelâyı
- 203 Sahâbe birle ol sâhib-sa‘âdet  
Varup anları itdiler ‘ıyâdet
- 204 Hitâb idüp ‘Aliyy-i Murtazâya  
Didi ger çâre isterseñ şifâya
- 205 Zirâ‘at hâkine ilkâ-yı bezr it  
Rızâ-yı Hakk içün bir nesne nezr it
- 206 Ümîd oldur irişüp lutf-ı Bârî  
İde sâlim ol iki şâhsârı
- 207 Bula serv-i dü-tâlar istikâmet  
Gide bunlardan ol za‘f u sakâmet
- 208 Yine olup ol iki gonca handân  
Bize ola bu ‘âlem gül gülistân
- 209 İde şenlikleri dünyâyı hurrem  
Dil-i mahzûnumuzdan def‘ ola gam
- 210 Kulag urdı çü Haydar ol kelâma

Hemân nezr eyledi üç gün sıyâma

- 211 Yanınca Fâtıma ol hûb-sîret  
Bile itdi ol üç gün savma niyyet
- 212 Görüp Fıddâ dahı bu ihtimâmı  
Derûndan iltizâm itdi sıyâmı
- 213 Üçi dahı didiler yâ İlâhî  
Ki ‘âciz kullaruñ sensin penâhı
- 214 Virürseñ bu iki tıfla ifâkat  
Üçümüz dahı itdük savma niyyet
- 215 Bir iki gün geçüp bu hâlet üzre  
İkisi dahı oldı sıhhat üzre
- 216 Yine evvelki rengi buldı ruhlar  
Turunc iken yine sîb oldı ruhlar
- 217 Yine nâzûk bedenler tâzelendi  
Ser-âmed turralar endâzelendi
- 218 Yine lebler letâfet bagladılar  
Hasedden goncalar kan agladılar
- 219 Murâdın bunlaruñ çün virdi Kâdir  
Sıyâma oldılar ol gün mübâşir
- 220 Eli tar idi ol dem Murtazânuñ  
Ki var idi be-gâyet fakrı anuñ
- 221 Gice oldukda açmaga sıyâmı  
Yog idi bir iki lokma ta‘âmı
- 222 Var idi bir Yehûdî adı Şem‘ûn  
Anuñ olmışdı hadden mâlî bîrûn
- 223 Olurdı Kal‘a-ı Hayber içinde  
Yatırdı tut ki râsû zer içinde
- 224 Varup Şem‘ûn-ı Hayberden zarûrî  
İdüp minnet ödünç aldı fatûrî
- 225 Üç ölçek arpa idi aldugı karz  
Getürdi itdi anı Fıddaya ‘arz
- 226 Didi var sen bunı tâhûna al git  
Çeküp bir sâ‘ımı biş dâne kurs it

- 227 Ki ol nân biş kişiyе ola hisse  
‘Aceb hâle irişdi soñra kıssa
- 228 Edâ itdi ne emr oldıysa bir bir  
Bişürdi nân-ı pencı kıldı hâzır
- 229 Çün ahşam oldı kıldılar namâzı  
Hudâya itdiler ‘arz-ı niyâzı
- 230 Kodılar biş ‘aded nânı miyâna  
Dahı el sunup almadın dehâna
- 231 Kapudan yalvarup bir sâ’il ol dem  
Didi ey ehl-i beyt-i Fahr-ı ‘Âlem
- 232 İdüñ şefkat ki ben üftâde miskîn  
Niçe gündür ki kaldum ac u gamgîn
- 233 Ta‘âm ile idüñ derde devâmı  
‘İvaz ola size cennet ta‘âmı
- 234 Çü hisse zâhir oldı kıssasından  
Hemân her biri geçdi hissesinden
- 235 Ne var ise miyândan kaldurup hep  
Aña virdiler anları müretteb
- 236 Hepisi suyla itdiler iftâr  
Bunuñ üstine geçdi ol şeb-i târ
- 237 Yine yarındası gün ol cemâ’at  
Kamusı eylediler savma niyyet
- 238 Cevüñ bir sâ’ını dahı idüp un  
Bişürdiler yine biş nân-ı yeksûn
- 239 Yine iftâr vaktinde kemâ-kân  
Zuhûra geldi bir dermânde mihmân
- 239 Yetîm imiş gelüp itdi su’âli  
Aña virdiler ol nân-ı helâli
- 241 Yine ekl itmeyüp ol şeb ta‘âmı  
Yine suyla açdılar sıyâmı
- 242 Üçinci gün irişince yine şâm  
Didiler kim kılalum nezri itmâm
- 243 Yine sâ’im olup sabr eylediler  
Gör a nefse niçe cebr eylediler

- 244 Cevüñ bir ölçeği kalmışdı anı  
Ögüdüp itdiler biş dâne nânı
- 245 Yine ahşam olıcak gör kazâyı  
İşitdiler kapudan bir nidâyı
- 246 Didi kim rahm idüñ ben bir esîrem  
Niçe gündür ki ac u nâ-güzîrem
- 247 Miyândan kaldurup biş dâne nânı  
Kamusı ol esîre virdi anı
- 248 Suyıla açdı her biri orucın  
Isırmadı birisi etmek ucın
- 249 Yine cû‘ ile çıkdılar sabâha  
Fidâ olsun dil ü cân ol salâha
- 250 Sabâh ol kâşif-i sırr-ı velâyet  
Peyam-berden yaña itdi ‘azîmet
- 251 Bile alup ol iki tıfl-ı pâki  
Resûl öñinde varup öpdî hâki
- 252 Sararmışdı beñizler nitekim mûm  
Bedenler dîtrer idi tut ki mahmûm
- 252 Ferâh-ı tayr-veş ol iki yavru  
Olup lertzân çekerlerdi bu cevri
- 254 Dimezlerdi bizi kurtar bu gamdan  
Şikâyet eylemezlerdi elemnden
- 255 Nazar itdi çü Peygam-ber bu hâle  
Terahhum oldı kalbine havâle
- 256 Be-gâyet şefkatinden bagrı yandı  
Dütünü âhınuñ göge boyandı
- 257 Habîb-i pâke çün geldi bu şefkat  
Hemân cûş eyledi deryâ-yı rahmet
- 258 İdüp bunlara Hak lutf-ı cemîli  
Beşâretlerle saldı Cebre’îli
- 259 Beyân kılmaga virdügi ‘atâyı  
Resûle nâzil itdi “hel etâ”yı
- 260 Ki makbûl oldı ol hâlis ‘ameller



Virildi anlara ni‘me’l-bedeller

- 261 Olup me’vâları ‘Adn-i mü’eyyed  
Olurlar mülk-i bâkîde muhalled
- 262 Girenler çıkmaz ol dârü’l-bekâdan  
Gam olmaz anlara anda fenâdan
- 263 Giren aña görür rûz-ı cezâda  
İren anda irişür her murâda
- 264 İderler kasr-ı cennetde neşâtı  
Döşerler anda istebrak bisâtı
- 265 Kabâlar sündüs-i zîbâ bedende  
Yürürler serv-i sebz olup çemende
- 266 Buhûr idüp libâsa misk-i ezfer  
Geyerler nûrdan tâc-ı mücevher
- 267 Nişîmen suffice-i gülzâr-ı cennet  
İderler hûrlarla ‘îş ü ‘işret
- 268 Şarâb-ı Selsebîl ü ‘ayn-ı Tensîm  
Kimi zer kâse-i bezmüñ kimi sîm
- 267 Olup dârât ile râkib Burâka  
Olurlar garka zîb ü tumturâka
- 270 Ne menzilgâha olursa giderler  
Makâmâtı ser-â-ser seyr iderler
- 271 Görürler anda dîdâr-ı Hudâyı  
Nitekim leyle-i bedr içre ayı
- 272 Sirâyet eyleyüp nûrı cemâlûñ  
Kemâle irgürür hüsnin ricâlûñ
- 273 Eger hatun ise sultân olur ol  
Ne sultân âfet-i devrân olur ol
- 274 Ne deñlü pîre-zen olsa muhakkak  
Anı bir tâze mahbûbe ider Hak
- 275 Virür endâmına bir hüsn ü zîbâ  
Ki aña reşk ider vildân u havrâ
- 276 Niçe hûrî olur aña perestâr  
Olurlar emrine anuñ nigehtâr

- 277 Eger tıfl ise bir şeh-zâde olur  
Kamu teklîfden âzâde olur
- 278 Anı bir kâra meşgûl eylemezler  
Bir üstâda virüp kul eylemezler
- 279 Biner iner geyer zîbâ kabâlar  
Yanında cem‘ olur her âşinâlar
- 280 Dahı çokdur ‘atâlar gûne gûne  
Bu zikr olan degül illâ numûne
- 281 Gel imdi başuña cem‘ eyle ‘akluñ  
Oñat fehm eyle fehvâsın bu naklûñ
- 282 Eger oldıysa ey merd-i mükemmel  
Gözûñ kuhl-ı basîretle mukahhal
- 283 Budur fehvâsı kim tâ‘at idenler  
‘Amelde râh-ı ihlâsa gidenler
- 284 Sevâbından anuñ mahrûm olmaz  
Cehennem âteşine mûm olmaz
- 285 Şu kim hâlî degül sa‘y u talebden  
Tesellîler bulur yarın Çalapdan
- 286 İlâhî yarlığa yarın günâhum  
Sepîd it ‘afv ile rûy-ı siyâhum
- 287 Baña mahlas didi bir pâk-meşreb  
Yalan itme anı mahşerde yâ Rab
- 288 Anuñ yüzi suyına ber-murâd it  
Mutahhar rûhını fazluñla şâd it

### **Behişt-i Düvüm**

- 289 İden peydâ vücûd-ı kâ’inâtı  
Kılan ecsâda mahbes şeş cihâtı
- 290 Zemîn üstinde insânı yaratdı  
Kimin bînâ kimin kûr u ker itdi
- 291 Koyup tab‘-ı beşerde ihtilâfât  
Havâle itdi aña niçe âfât
- 292 Fetîl-i şem‘a beñzer rişte-i cân  
Anı uyarmaz illâ nûr-ı îmân

- 293 Hevâdandur sakın anuñ fesâdı  
Hevâ olmışdur anuñ tünd-bâdı
- 294 İdenler eylük eylük bulı gelmiş  
Cezâ ihsâna ihsân olı gelmiş
- 295 Murâd elden sehâyıla ‘atâdur  
Sanur nâ-dân anı halka cefâdur
- 296 Ayaklardan dahı ey tâlib-i sûd  
Cihâd u hacca varmak oldı maksûd
- 297 Hakikatde budur sözüñ me’âli  
Saña zînetdür a‘zâñuñ kemâli
- 298 Sebebdür çeşm ü ebrû gûş u bînî  
Güzel göstermege sâhiblerini
- 299 Birisi eksük oldukda ne minnet  
Zuhûr eyler vecâhetde rekâket
- 300 İki nesne kamudan mu‘teberdür  
Kulak tut bu haber sâdık haberdür
- 301 İkisi dahı ammâ ma‘nevîdür  
Biri göñül biri ‘akl-ı kavîdür
- 302 Saña sanma ki ‘akl ikrâr olupdur  
Başuñda tâc-ı cevherdâr olupdur
- 303 Göñül gerçi degüldür sîm ü zerden  
Gögüs levhidür ol saña güherden
- 304 Bir eser kanda kim baksañ muhakkak  
İhâta eylemişdür ni‘met-i Hak
- 305 Garîk-i ni‘metisin fî’l-hakîka  
Yüri şükrinde fevt itme dakîka
- 306 Edeb terk itmeyendür aña şâkir  
Olur merdûd edebsüz olsa zâkir
- 306 Edeb üzre olan fânî cihânda  
Muzaffer oldı hem bunda hem anda

### **Hikâye-i Mergûbe**

- 308 Meger üç kimse bir gün kavlı iderler  
Levâzım cem‘ine taga giderler

- 309 İderken anda maksûdı müheyyâ  
Bulıtlar kopdı yağmur oldu peydâ
- 310 Çü bârân eyledi gökden nüzûli  
Varup bir gâra itdiler duhûli
- 311 İrişüp nâgehân takdîr-i Yezdân  
Yirinden kopdı bir taş oldu galtân
- 312 Kazâyıla gelüp ol seng-i mümted  
Kapusın büsbütün itdi anuñ sed
- 313 Kapayup anı zulmet-hâne itdi  
Yapılmış dilleri vîrâne itdi
- 314 Kalurlar yol bulunmaz reft ü pûya  
Kaçup yağmurdan ugrarlar toluya
- 315 İhâta eyler anda anları gam  
Olur ol gâr bir çâh-ı cehennem
- 316 Görürler çâre yok hergiz necâta  
Göñüllerde recâ kalmaz hayâta
- 317 Bu hâl üzre geçerken zâr u gamgîn  
Birisinden açıldı çeşm-i hak-bîn
- 318 Ki Hakkuñ aña ilhâmı irişdi  
Halâsuñ ya'nî hengâmı irişdi
- 319 Didi yârânına bu böyle olmaz  
Ki ye's erbâbı derde çâre bulmaz
- 320 Gelüñ râh-ı halâsa göz turalum  
Ol ulu âsitâna yüz turalum
- 321 'Amel kim itmişüzdür her birümüz  
K'anuñla olısar yarın yirümüz
- 322 İdüp anuñ içinde hâlisin yâd  
Du'âlarla kılalum âh u feryâd
- 323 Ola kim Hazret-i Hakk ide rahmet  
Gide bizden bu mihnet bu kasâvet
- 324 Didi evvel biri kim eylerem yâd  
Tutupdum ücrete bir iki ırgad
- 325 Seherden şâma deñlü nitekim kul  
Kamu olmuşlar idi kâra meşgûl

- 326 Birisi ol işe geç girmiş idi  
Ki evvel vakti zuhruñ irmiş idi
- 327 Egerçi nısfı irmişdi nehârı  
Velî anlar kadar var idi kârı
- 328 Gice ücretlerini virdüğüm dem  
Ber-â-ber virdüm anlarla aña hem
- 329 Birisi anlaruñ oldı gazabnâk  
Elinden saçdı sîmin nitekim hâk
- 330 Hasûd imiş ki reşkin zâhir itdi  
Bıragup ücretini vardı gitdi
- 331 Çü gördüm bilmedi sûd u ziyânı  
Varup cem‘ eyleyüp hıfz itdüm anı
- 332 Ol esnâda sürek geldi sebîle  
Satun aldum anuñla bir fasîle
- 333 Zamân geçdi fasîle bende kaldı  
Velî yıldan yıla nesli çoğaldı
- 334 Mürûr itdi bunuñ üzre niçe sâl  
Benüm taht-ı yedümde kaldı ol mâl
- 335 Yog iken nâ-gehân fikrümde nâmı  
İrişdi gûşa bir pîrûñ selâmı
- 336 Ben anı bilmedüm evvel nazarda  
Ki olmuşdı tagayyür aña perde
- 337 Didi sende benüm hakkum kalupdur  
Beni bunda anuñ fikri salupdur
- 338 Didüm hakkuñ senüñ bende nedendür  
Didi kim ücret-i kâr-ı bedendür
- 339 Çü geldi ‘akluma bildüm anı ben  
Ne hâsıl oldıyısa ücretinden
- 340 İnek öküz kamusın virdüm aña  
Dil ü cândan du‘âlar itdi baña
- 341 Didi bu sözleri dahı el açdı  
Gözinüñ kanlu yaşın hâke saçdı
- 342 Ki ey Hayy u Kerîm ü Berr ü Bârî

Riyâsuz itdüm ise ben bu kârı

- 343 Bu mahbesden bizi sen eyle âzâd  
Saña mahsûsdur i‘dâm u îcâd
- 344 Zuhûra geldi ol dem emr-i Yezdân  
Karâr itmişken ol taş oldu lerzân
- 345 Taharrükden hacer bir hâle irdi  
Ki gâra bir taraftan şu‘le girdi
- 346 Çün irdi âhire bunun beyânı  
Şürû‘ idüp didi ol merd-i sâî
- 347 Ki kaht olmuşdı bir yıl bu vilâyet  
Cihân halkın zebûn itmişdi killet
- 348 Zamânında iken bulmadı bârân  
Göñüller oldu ol gamdan perişân
- 349 Hubûbuñ adı var kendü yog idi  
Bu yoklukdan helâk olmuş çoğ idi
- 350 Baña ol yıl gınâ virmişdi Bârî  
Derûna cevce gam olmazdı târî
- 351 Benüm artardı harcumdan nukûdum  
Yanardı âteş-i reşke hasûdum
- 352 Var idi bir cemîle yanumuzda  
Karâr itmişdi meyli cânumuzda
- 353 Kemâl-i hüsn ile mevsûfe idi  
Edeb erkân ile ma‘rûfe idi
- 354 Gürisne kalup ehli vü ‘ıyâli  
Zarûrî benden itmişdi su‘âlî
- 355 Dimişdüm başum üzre her murâduñ  
Eger maksûda olmazsa ‘inâduñ
- 356 Baña râm ol murâduñ hâsıl olsun  
Saña her günde gendum vâsıl olsun
- 357 İşitdi çünki benden bu hitâbı  
Dehânın açmayup kesdi cevâbı
- 358 Varup ahvâli zevcine didi hep  
İşidüp ol dahı itdi bükâ hep

- 359 Bir iki gün yine sabr itdi cû'a  
Velî gâyetde za'f irdi fûrû'a
- 360 Nic'itsün gördi olmaz bi'z-zarûre  
İcâzet virdi zevci ol fücûra
- 361 Didi kim var rızâ vir ol vebâle  
Hudâ 'afv eyleye kıyma 'ıyâle
- 362 Gelüp virdi murâdumca cevâbı  
'İmâret eyledi kalb-i harâbı
- 363 Salup bir halvete bâlîn ü pister  
Visâlin sîne de kıldum mukarrer
- 364 Soyınmaga çün âgâz itdi hatun  
Bozıldı beñzi kalbi oldu mahzûn
- 365 Ruhı pejmürde oldu çeşmi giryân  
Teni pâlûde-i ter gibi lerzân
- 366 Didüm n'oldı sebep bu ıztırâba  
Didi korkaram ugrayam 'azâba
- 367 Baña bu söz be-gâyet itdi te'sîr  
Hemân sandum ki urdı bagruma tîr
- 368 Didüm zen hilkatinde ola noksân  
Ba'îd ola yanında terk-i fermân
- 369 Ricâlûñ 'aklı kâmil fehmi çâlâk  
Niçün ola tarîk-i Hakda nâ-pâk
- 370 Turup pisterden anda tevbe itdüm  
Ol egri yolu koyup togrı gîtüm
- 371 Zahîre virdüm ol hatuna vâfir  
Didi itsün 'ivaz ol Hayy u Kâdir
- 372 Pes el açup didi ol kes İlâhî  
Bilürsin sen bu ahvâli kemâhî
- 373 Riyâ yog ise bu kârumda mestûr  
Bu gâruñ vir açılmasına destûr
- 374 Çün andan bu tazarru' oldu peydâ  
Hacerden ıztırâb oldu hüveydâ
- 375 Olup lerzân yine itdi karârı  
Ezelden artuk açıldı kenârı

- 376 Ziyâ evvelkiden oldu füzûnter  
Ki görmek bir yirin oldu müyesser
- 377 İdüp çünkim suhanda ihtimâmı  
Bunuñ da âhire irdi kelâmı
- 378 Üçinci merd el açup didi yâ Rab  
Saña ma‘lûmdur ahvâlümüz hep
- 379 Var idi bir katî‘a gûsfendüm  
Güderdüm anları sahrâda kendüm
- 380 Katı pîr olmuş idi vâlideynüm  
Velî olmuşlar idi nasb-ı ‘aynum
- 381 İderdüm anlaruñ hizmetlerini  
Bilürdüm hâsılı hürmetlerini
- 382 Koyundan süd sagup it‘âm iderdüm  
Neye gönderseler dönmez giderdüm
- 383 Meger bir gün koyun sagmaga vardum  
Ki bir dem eyleyem çübâna yardım
- 384 Beni habs itdi ol gün anda yagmur  
Şeb irişince oldum anda mecbûr
- 385 Gice incinmesünler diyü benden  
Sagup bir mihlebe tâze lebenden
- 386 İletdüm anlara kim olalar sîr  
Velî gördüm uyumuş ol iki pîr
- 387 Tutup ol mihlebi turdum elümle  
Dizüm anda neler çekdi bilümle
- 388 Uyanurlar diyü turdum nazarda  
Uyanmadılar illâ kim seherde
- 389 Seher vaktinde kalkup itdiler nûş  
Dürişdüm eyledüm hâtırların hoş
- 400 Bu râya irdi çün takdîr-i maksûd  
El açup didi ey matlûb u Ma‘bûd
- 401 Bu kârumda eger var ise ihlâs  
Bizi kıl rahmetüñ bahrine gavvâs
- 402 Bu sengüñ zulmetin eyle izâle



Karañu gicede döndük hilâle

- 403 Zihî kudret ki zâ'il oldı ol taş  
Yile varmış gibi bir dâne haşhâş
- 404 Riyâdan pâk olan hâlis ‘ameller  
Hem a‘lâlardur anlar hem eceller
- 405 Şefî‘ olup du‘â-yı müstecâba  
İrişdürmek olurmış feth-i bâba
- 406 Ki bu kıssa kelâm-ı mu‘teberdür  
Ehâdîsüñ sıhâhından haberdür
- 407 Nazar kıl imdi ma‘nâ-yı hadîse  
Kulak tutma inanmayan habîse
- 408 Kerâmet gizlüdür hüsn-i ‘amelde  
Mukadder eyle olmışdur ezelde
- 409 ‘Amelsüz intizâr-ı evc-i ‘izzet  
Belâhetdür belâhetdür belâhet
- 410 İlâhî sen Kerîm ü bî-garazsın  
Yine ihsânuña kendüñ ‘ivazsın
- 411 Cihânda lutfuña iren mü’eddeb  
Görür dîdâruñı olur mukarreb
- 412 Temennâmuz budur rûz-ı ezelden  
Ki mahrûm eyleme hüsn-i ‘amelden

### **Behişt-i Sivüm**

- 413 Cevâd ol Hayy u Kâdirdür ki cûdı  
Hibe kılmışdur eşyâya vücûdı
- 414 Sehâ kim zînet-i tab‘-ı beşerdür  
Anuñ cûdı ziyâsından eserdür
- 415 Cuvân-merd ins ü cinnüñ mihteridür  
Vücûdı cûd-ı Hakkuñ mazharıdur
- 416 Egerçi çokdur evsâf-ı hamîde  
Kamusından sehâvetdür güzîde
- 417 Dimişdür Hazret-i Hakkuñ Resûli  
Ol iki ‘âlemüñ aslu’l-usûli
- 418 Sehâ kim halk içinde mu‘teberdür

Cinân bâğında bitmiş bir şecerdür

- 419 Bize zâd olmagiçün berg ü bârı  
Yayılmışdur cihâna şâhsârı
- 420 Olup perverdesi lutf-ı Hudânuñ  
Yapışdı her ki bir şâhına anuñ
- 421 Çeküp âhir anı ol şâh-ı pür-bâr  
Zarûrî itdürür Firdevse reftâr
- 422 Ecel derdine olmaz çünki çâre  
Dilâ sen de yapış bir şâhsâra
- 423 Gelen bunda gider bir kimse kalmaz  
Kefenden mâ-‘adâ bir nesne almaz
- 424 Heves itme gurûr-ı tâc u tahta  
Gerekmez saña illâ iki tahta
- 425 Düşürseñ nâ-gehân bir iki sîmi  
Yakarsın sînede nâr-ı cahîmi
- 426 Kazâ-yı mübrem irdükde felekden  
Elüñde nesne kalmaz mâ-melekden
- 427 Bu fânîden dem-â-dem almaga kâm  
Yilersin yıl gibi kılmazsın ârâm
- 428 Bekâ-yı câvidâna yıl yilerseñ  
Ölümden öñdin öl dirlik dilerseñ
- 429 Hisâbına iderseñ iltifâtı  
Deñizden katredür mâlûñ zekâtı
- 430 Sen anı virmede zahmet çekersin  
Bu mezra‘da şekâ tohmin ekersin
- 431 Anuñçün didi sultân-ı dü ‘âlem  
Ki mevt-i agniyâdur hasret ü gam
- 432 Fakîrûñ mevti oluristirâhat  
Anuñ bagrını yakmaz nâr-ı hasret
- 433 Sehâyile çıkar dünyâyı dilden  
Dil-i âlûdeñi pâk eyle gilden
- 434 Kimûñ tab‘ında kim râsih ola cûd  
Firâk odına yakmaz anı Ma‘bûd

- 435 Eger tâze cevândur ol eger pîr  
Fenânuñ fakdı itmez aña te'sîr
- 436 Zihî devlet ki bir merd-i Müselmân  
Bula ol vasf ile 'âlemde 'unvân
- 437 İrüp rûz-ı ecel itdükde rihlet  
Sehâ anuñ komaz kalbinde hasret
- 438 Şu kim aña sehâ vasfı virildi  
Cihânda beg gibi dirlik dirildi
- 439 Gözüñ açup gel imdi 'âkılâne  
Nazar kıl gör neler gelmiş cihâna

### **Hikâye-i Güzîde**

- 440 'Arabda var idi Ma'n adlu bir mîr  
Vücûdı cûd ile olmışdı tahmîr
- 440 Göçer ulu 'Arablardan olupdı  
Sehâda nâmı dünyâyâ tolupdı
- 441 Olupdı zer yanında bir avuç kum  
Gelen dergâhına gîtmezdi mahrûm
- 443 Şecâ'atde bahâdur gâzî idi  
Fezâ-yı himmetüñ şeh-bâzı idi
- 444 Konar olsa yol üstine konardı  
Mürüvvet şâhsârında dünerdi
- 445 Güzer kıldukda ebnâ-yı sebîle  
İderdi niçe eltâf-ı cemîle
- 446 Niçe günler ziyâfetler iderdi  
Murâd üzre ri'âyetler iderdi
- 447 Gider olsa virürdi zâd-ı râhı  
Olurdu anuñ a'dâdan penâhı
- 448 Koşardı yanına bir iki hem-râh  
Ki kasd ide harâmî aña nâ-gâh
- 449 Harâmîden zarar irişse yolda  
Taleb eylerdi anı sagda solda
- 450 Bulınursa gelüp hakkından anuñ  
İderdi aña envâ'ın ezânuñ

- 451 Eger el virmeyüp devr-i zamâne  
Bulınmazsa harâmîden nişâne
- 452 Öderdi yolcınun olan ziyânın  
Dirîg itmezdi andan hânumânın
- 453 İşidüp nâmın ol kân-ı sehânuñ  
Gelür kapusına bir şâ‘ir anuñ
- 454 Niçe gün kâdir olmaz ‘arz-ı hâle  
Mülâkî olamaz ol hoş-hisâle
- 455 Görür olmaz birine kullarınun  
Su’âl eyler kolayın yollarınun
- 456 Ki ‘azm itse kaçan bustâna ol mîr  
Kerem lutf eyle sen baña haber vir
- 457 Var idi bir ser-âmed bûstânı  
Ki bârû içine almışdı anı
- 458 Gelürdi taşradan bir âb-ı cârî  
Suvarurdu girüp ol sebzezârı
- 459 Gelür dîvâruñ altından girerdi  
Sudan ol bâğa revnaklar irerdi
- 460 İçerde ol suyuñ üstinde sultân  
Oturup itmege etrâfı seyrân
- 461 Murâdı üzre bir köşk itmiş idi  
Binâsına niçe zer gitmiş idi
- 462 Meger bir gün murâd idindi hazret  
Agalarla ide bâğında sohbet
- 463 Bu hâli şâ‘ire bildürdi ol kul  
Ki beg bustâna gitdi müntebih ol
- 464 Bu sözi gûş idicek gitdi şâ‘ir  
Varup bir şi‘r peydâ itdi şâ‘ir
- 465 Anı bir tahtanın üstine yazdı  
Sanasın sikke[y]i mermerde kazdı
- 466 Revân olup hemân râh-ı savâba  
Tolaşdı taşradan vardı ol âba
- 467 Suya saldı su anı aldı gitdi  
Varup bârû içinden köşke yitdi

- 468 Oturmışdı serîr üstinde ol şâh  
Görür ol tahta[y]ı su üzre nâ-gâh
- 469 Su üstinden getürdüp anı gördi  
Okuyup yüzine gözine sürdi
- 470 Hemân âdem salar şâ'ir bulınur  
Felâket çarhınıñ necmi tolinur
- 471 Virür ol şâ'ire ol mîr-i Ekrem  
Bir ednâ beyt içün on bedre dirhem
- 472 Alur mâlı gider şâ'ir ferahnâk  
Olur telvîs-i gamdan sînesi pâk
- 473 Begüñ destinde ol şî'r-i dil-âvîz  
Okur ashâbına olur şeker-rîz
- 474 Çün oldı ibtidâ bast-ı simâta  
Sokar ol tahta[y]ı zîr-i bisâta
- 475 Yaturlar ol gice ol bâg içinde  
Nitekim ehl-i huld uçmag içinde
- 476 Geçüp gice sabâh oldukda yine  
Gelür ol tahta mîrûñ hâtırına
- 477 Okur üstindekin yine ne kim var  
Getürür şâ'iri yanına tekrâr
- 478 Yine evvelki gibi 'izzet eyler  
Aña on bedre dahı himmet eyler
- 479 Ki her bedre onar biñ dirhem olur  
Aña mâlik olanlar bî-gam olur
- 480 Egerçi aldı ol in'âmı şâ'ir  
Derûnında velî gam oldı zâhir
- 481 Didi ben ol cevân-bahta ne sundum  
Ki in'âm almaga tekrâr okındum
- 482 Bir ednâ beyte kim bir dâne güldür  
Bu deñlü câ'ize câ'iz degüldür
- 483 Beni tahmîk ider mîr-i cihândâr  
Yine alur bu mâlı âhir-i kâr
- 484 Virüp bu vehmi ol gün aña iblîs

‘Abes efkâr ile itdürdi telbîs

- 485 Halâs olmag için ol mâlî reddin  
Hemân ol şeb firâr itdi beleden
- 486 Üçinci gün sabâh oldukda ol şâh  
Okur ol tahtadan ol beyti nâ-gâh
- 487 Yine kasd eyler ol mîr-i e‘âlî  
Ki vire şâ‘ire on bedre mâlî
- 488 Ararlar şâ‘iri ‘ayn u eser yok  
Ne yaña gitdüginden bir haber yok
- 489 Bilürler kim firâr itmiş beleden  
Kaçar devlet ırğa bî-hiredden
- 490 Çün anuñ hâli Ma‘na oldı ma‘lûm  
Didi bu idi dil levhinde mersûm
- 491 Ki geldükçe dile bu beyt-i ‘âlî  
Virem ol şâ‘ire on bedre mâlî
- 492 Meger kim mahzenümde kalmaya mâl  
‘Atâdan el çekem tagyîr ola hâl
- 493 Gel imdi sen ne dirsın bu sehâya  
Virilmez degme insâna bu pâye
- 494 Niçe devletlü kullar var cihânda  
Ki reşk eyler melekler âsumânda
- 495 Kula virgi virilmişdür ezelde  
Murâdâta irilmişdür ezelde
- 496 Şular kim olmadı kısı-ı asamdan  
Haber fehm itdiler ceffe’l-kalemde
- 497 Bulanlar buldılar ol dem hüdâyı  
İşidenler işitdiler sadâyı
- 498 Egerçi olıcak ol dem olupdur  
Bulanlar hisse[y]i bunda bulupdur
- 499 Eyü işde olan bunda kem olmaz  
Velî nâ-merd-i bed-kâr âdem olmaz
- 500 Bize lâzım olan havf u recâdur  
Ki diller derdine anlar devâdur

- 501 Yaraşık görmezüz ‘ucb u riyâyı  
Redâ-yı Hak bilürüz kibriyâyı
- 502 Ezel bezmindeki câm-ı tahûruñ  
Kesüpdür cur‘ası ‘ırkın gurûruñ
- 503 Fenâ küncinde dermânde garîbüz  
Velî âşüfte-i rûy-ı Habîbüz
- 504 Ümîdi kesmezüz lutf-ı Hudâdan  
Yakaruz şem‘i nûr-ı Mustafâdan
- 505 İlâhî sâ‘il-i zâruz kapuñda  
Niçe eksükligümüz var tapuñda
- 506 ‘Amelde fi‘l-hakîka lıslaruz biz  
‘Akâ‘idde velî hâlislerüz biz
- 507 Ümîdi rahmete kalmış gedâyuz  
Biz anuñla ezelden âşinâyuz
- 508 Ki yog iken vücûda sen getürdüñ  
Bizi sinn-i eşedde sen yetürdüñ
- 509 Kemâl-i perveriş envâ‘-ı ni‘met  
Degül midür efendi ‘ayn-ı rahmet
- 510 Fakîre rahm iden yanuñda makbûl  
Ya senden niçe rahmet ummasun kul
- 511 Kuluñ ‘afv-ı günâh itse seversin  
Günâhın aña âh itse seversin
- 512 Eger rahmet eger ‘afv-ı cerâ‘im  
Saña yeg yaraşur saña mülâyim
- 513 Salâha kondurursın ehl-i dîni  
Seversin hüsn-i hulkuñ sâhibini
- 514 Beşer kâdir degülken intikâma  
Bağılasa günâhın hâs u ‘âma
- 515 İdersin anuñ ikrâmına ragbet  
Virürsin rahmetüñden aña hil‘at
- 516 Seni ben kankı nâmuñla añayın  
Saña lâyük dili kanda bulayın
- 517 Benüm ‘acz ile yogrılmış türâbum  
Meger fazluñdan ola feth-i bâbum

- 518 İlâhî Kirdigâr-ı ashıyâsın  
Vedûd-ı enbiyâ vü evliyâsın
- 519 Kapuñda bende-i efkendesiyem  
Ne bende bendesinüñ bendesiyem
- 520 İlüñ cûdından ey Perverdigârum  
Baña yegdür kapuñda intizârum

### **Behişt-i Çehârum**

- 521 Melik oldur ki mülkidür bu ‘âlem  
‘İbâdîdur anuñ evlâd-ı Âdem
- 521 Habîbin itdi fahr-ı ehl-i İslâm  
Enâma itdi anı ‘ayn-ı in‘âm
- 523 ‘İbâdına işi dâ’im keremdür  
Kerem ehli yanında muhteremdür
- 524 Cihâna geldi niçe merd-i huşyâr  
Yolında itmedi mestâne refâtâr
- 525 Fenâsın añladı dünyâ-yı dünüñ  
Zebûnı olmadı mekr ü füsûnuñ
- 526 Bekâ mülke heves kıldı dürişdi  
İki ‘âlemde maksûda irişdi
- 527 Murâdı üzre cem‘ idüp zahîre  
Mürîd oldı varup bir puhte pîre
- 528 Revân oldı bekâ râhına gamsuz  
Geçindi dâr u dünyâda elemsüz
- 529 Tevekkülde sebât üstine oldı  
Derûnı nûr-ı îmân ile toldı
- 530 Düşe kalka komadı râhı elden  
Tekâsül itmedi ‘ilm ü ‘amelden
- 531 Edeb tâcın idüp başına efser  
Sa’âdet ehli içre oldı server
- 532 Dürişdi rûz u şeb ihyâ-yı dîne  
‘Adâvet itdi iblîs-i la‘îne
- 533 Benî Âdemde evvelden budur hâl  
Kimi kesb ehli olur kimi kengâl



- 534 Kimisi nakd-i ‘ömri itdi zâyî‘  
Aña fisk u fücûr oldı sanâyî‘
- 535 Firîb-i nefse aldandı fütâde  
Helâk oldı gam u derd ü ‘anâda
- 536 Mukârin olmayup ehl-i salâha  
Zafer bulmadı sa‘y idüp felâha
- 537 Olup iblîs-i pür-telbîse hem-râh  
Diler kim eyleye yarın yirin çâh
- 538 Geberdi kendü kaldı bunda mâlı  
Anuñ gâyet mükedder oldı hâlî
- 539 Gidüp ol kaldı dünyâsı yirinde  
Yazıldı var yimezler defterinde
- 540 Kimi takvâyıla dirlik dirildi  
Dü ‘âlemde aña ‘izzet virildi
- 541 Olup erbâb-ı takvânuñ mu‘îni  
Öñinde tutdı Kur’ân-ı Mübîni
- 542 Niçe miskîne ihsânı irişdi  
Niçe bîmâra dermânı irişdi
- 543 Ehibbâsına mebzûl oldı Hilmi  
Hem evlâdına ta‘lîm itdi ‘ilmi
- 544 İki ‘âlemde anuñdur sa‘âdet  
Ba‘îd olmış durur andan şekâvet
- 545 Gel imdi var ise ‘akluñ nazar kıl  
Bu hâlî gör dalâletden hazer kıl

### **Hikâye-i Nâfi‘a**

- 546 Meger var idi bir merd-i mü’eddeb  
Ki dirlerdi Sa‘îd İbni Müseyyeb
- 547 Ulularından idi tâbi‘înüñ  
Yog idi hadd ü hasrı tâbi‘înüñ
- 548 Fakîh ü müctehid sünnî er idi  
Kamu tâbi‘leri sâlihler idi
- 549 Anuñ bir duhteri var idi tâze  
Boyı beñzerdi serv-i ser-fîrâza

- 550 Yog idi hûrîde hüsn ü cemâli  
Kaşı olmuşdı san ‘îdüñ hilâli
- 551 Kemâl-i hüsnine yog idi noksân  
Saçı zulmet ‘izârı nûr-ı Yezdân
- 552 Yüzin görenler olurdı gulâmı  
Cihânı tutmuş idi sît ü nâmı
- 553 Cemîle idi hem mestûre idi  
Kamu efvâhda mezkûre idi
- 554 Ol esnâlarda ol ‘asruñ emîri  
Îşidüp ol nigâr-ı dil-pezi
- 555 Anı kılmag için oglına zevce  
Şeref mâhın çıkarmag için evce
- 556 Sa‘îde niçe âdem salmış idi  
Aralık şöyle muhtel kalmış idi
- 557 Münâsib görmemişdi şeyh-i ekber  
Vire âlûde-i dünyâya duhter
- 558 Emîr ol şeyh-i mazlûma idüp kîn  
Benî Âdem olur kîn ile bî-dîn
- 559 Bahâne eyleyüp ber-vech-i tezvîr  
Anı hadden ziyâde itdi ta‘zîr
- 560 Nic’itsün sabr idüp şeyh ol ezâyâ  
Zahîre eyledi rûz-ı cezâyâ
- 561 Hazer kılmadı ta‘zîr-i eşedden  
Dögilmek yegdür ifsâd-ı veleden
- 562 ‘Aceb hâlet budur kim şeyh-i mezkûr  
Fakâhetle olupdı dehre meşhûr
- 563 İderdi mescidinde ders-i ‘âmı  
Okurdı andan ol ‘asruñ kirâmı
- 564 Gelüp nûrından anuñ her sehergâh  
Alurlardı güneşden nitekim mâh
- 565 Meger bir gün biri olmadı hâzır  
Ki sabr-ı fâkada olmuşdı mâhir
- 566 Aña dillerde ‘Abdu’llâh idi nâm

Sıfat olmuşdı aña hüsn-i İslâm

- 567 Çün ırte oldu uçdı dîdeden hâb  
Dirildi şeyh öñinde cümle ashâb
- 568 Didi dün derse hâzır olmayana  
Eyit saña ne olmuşdur bahâne
- 569 Didi ehlüm bekâ mülke tutup yol  
Ben olmuşdum anuñ defnine meşgûl
- 570 Didi imdi gerekdür saña hatun  
Ki fūrce bulmaya iblīs-i mel‘ûn
- 571 Didi fakr u fenâdur baña pîşe  
Evümde kudretüm yok berg ü ‘îşe
- 572 Benüm gibi gedâ yokdur felekde  
İki akçam var ancak mâ-melekde
- 573 Baña kim ihtiyâr idüp vebâlin  
Virüp âteşlere atar ‘ıyâlin
- 574 Didi diñle benüm saña sözüm var  
Elümde besledüm körpe kuzum var
- 575 Alursañ aslı yokdur kâl u kîlûñ  
Nikâh olsun hemân gönder vekîlûñ
- 576 Çün ‘Abdu’llâha sundı bu şerîdi  
Hicâbından ‘arak oldu eridi
- 577 Zamândan soñra başa dirdi ‘aklın  
Kelâmınuñ bu yüzden itdi naklin
- 578 Ki fîkr itdüm ki eblehlikdür ihmâl  
Vekîlüm hıdmetine itdüm irsâl
- 579 Nikâh idüp ‘acebdür bu mu‘ammâ  
Ol iki akça[y]ı itmiş müsemmâ
- 580 Hudâya ‘arz idüp hüsn-i niyâzı  
Gice kıldum cemâ‘atle namâzı
- 581 Pes andan mesken-i me’lûfe vardum  
Ta‘âm içün evümde şem‘ uyardum
- 582 Var idi zeyt ile bir pâre nânum  
İverdi anuñ iftârına cânım

- 583 Getürdüm ortaya zeyt ile nânı  
Ki iftâr eyleyem ol gice anı
- 584 Kapudan oldu bir âvâze peydâ  
Ta‘accüb oldu sînemde hüveydâ
- 585 Sa‘îdüñ savtına beñzetdüm anı  
Velî ma‘lûm idinmişdüm bu şânı
- 586 Ki çil sâl idi kim ol vâsıl-ı Hak  
Evinden mescide varurdu ancak
- 587 Didüm kimdür didi gel kapuyı aç  
Didüm pâyuñ türâbı başuma tâc
- 588 Gelen çün ol imiş bildüm hakîkat  
Didüm sür‘at idüp ey şeyh-i sünnet
- 589 Ne lâzım kendüñüz gelmek kapuya  
Haber olsa varurdum ben tapuya
- 590 Kapuyı açdugum dem gördüm anı  
Ki olmuş baht-ı bîdâruñ zamânı
- 591 Dimâgum bûy-ı misk itdi mu‘attar  
Bile gelmiş meger şeyh ile duhter
- 592 Didi kim hakkuñı kılmaga îsâl  
Getürdüm gel berü menkûhañı al
- 593 Elin alup hemân ol mâh-rûyı  
Harem içre salup çekdi kapuyı
- 594 Hicâb aldı beni gördükde anı  
Segirdüp gizledüm zeyt ile nânı
- 595 Haber itdüm çıkup ol dem sebîle  
Dirildi vâlîde kavm ü kabîle
- 596 Didiler virmezüz biz bunı saña  
Yürî sen geçme bir kaç gün bu yaña
- 597 Evine aldı mâder ben çekildüm  
Dügün itmekdür anuñ kasdı bildüm
- 598 Bunuñ üstine geçdi bir kaç eyyâm  
Şebistân-ı zifâfa irdi hengâm
- 599 Çün irdüm vakt olup vuslat şebine  
Nazar kıldum sa‘âdet kevkebine

- 600 Cemâli bî-bahâne hulkı makbûl  
Umûr-ı dîni benden yig bilür ol
- 601 Salâh-ı nefis ile perverde olmuş  
Aña takvâ hicâbı perde olmuş
- 602 İdüp hıdmetler ol hayru'n-nisâya  
Ben ilter oldum ibrîğın halâya
- 603 Güzer kıldı bu üslûb üzre bir ay  
Ki şeyhüñ meclisine basmadum pây
- 604 Çogalup oldı şevk-i âsitâne  
Turup bir subh-dem oldum revâne
- 605 Ziyâde oldı hadden diyü fergûl  
Varup oldum semâ'-ı derse meşgûl
- 606 Okındı ders ü tagıldı cemâ'at  
Baña tur diyü pîr itdi işâret
- 607 Gidüp kalmadı benden gayrı âdem  
Dönüp baña didi şeyh-i mükerrerem
- 608 Ki ehlüñle nedür hâlüñ beyân it  
Arañuz râzını bir bir 'ıyân it
- 609 Didüm kim himmetüñde dōst handân  
'Adûnuñ çeşm-i nâ-bînâsı giryân
- 610 Didi 'âsî olursa iktidâdan  
Elüñ korkıtma te'dîb-i 'asâdan
- 611 Nihâyet buldı çün söz bu arada  
Selâm itdüm turup ol hoş-nihâda
- 612 Eve ardumca ol dem şeyh-i Ekrem  
Revâne eylemiş bir kîse dirhem
- 613 Döküp ortaya itdük anı ma'dûd  
Yigirmi biñ tamâm idi zihî cûd
- 614 Niçe himmet durur yâ Rab bu himmet  
Neden kopdı bu gayret bu hamıyyet
- 615 Ki dünyâ ehli oldı aña menfûr  
Çerâğını fenânuñ gördi bî-nûr
- 616 Yüzine bakmadı aslâ emîrûñ

Elin aldı yire düşmiş fakîrûñ

- 617 Zamânuñ gör neye döndi mizâcı  
Esihhâyı marîz eyler ‘ilâcı
- 618 Meger kim eski olmışdur zamâne  
Anı muhtel ider ednâ bahâne
- 619 Hatâ didüm zamân her gün yeñidür  
Cihân evtân-ı ecsâduñ geñidür
- 620 Zamâne halkıdur olan mu‘avvec  
Revişde her biri olmışdur a‘rec
- 621 Bogazı derdine düşdi kamusı  
Añılmaz oldu Kakhâruñ tamusı
- 622 Hudâdan terk-i dünyâdur olan emr  
Degüldür bî-hired olmak içüp hamr
- 623 Degüller tâbi‘ ashâb-ı güzîne  
Alupdur bunları hırs-ı hezîne
- 624 Fenâdan kimse ‘ibret almaz oldu  
Salâh ehline ragbet kalmaz oldu
- 625 ‘Acebdür şimdi kim her bir mürâ’î  
İder bir ehl-i dünyâyâ senâyı
- 626 Yalan rü’yâ ile kul eyler anı  
Hudâ yanında makbûl eyler anı
- 627 Başında tâc elinde dâm-ı tesbîh  
Selefden itdürür kendüyi tercîh
- 628 Hamâkat ehlini dâm-ı temelluk  
İde geldi giriftâr-ı ta‘alluk
- 629 Düşer yanına anuñ ol Yezîdî  
Olur devr ü zamânuñ Bâyezîdî
- 630 Tasannu‘lar idüp ol cilt-i güm-râh  
Kıvanur illere anuñla her gâh
- 631 Mürâ’iler idüp dâ’im bu kârı  
Bulurlar halk içinde i‘tibârı
- 632 Kimi beg şeyhi olur kimi pâşâ  
Biri anuñ Müselmân ola hâşâ

- 633 Hakikat şeyhi oldur kim işitdün  
Basîr iseñ aña göre iş itdün
- 634 Beni anlardan itme yâ İlâhî  
Müyesser kıl rızâñ oldugı râhı
- 635 Eger meyl eyleyüp ol yaña nefsum  
Tazarru‘lar iderse saña nefsum
- 636 Kabûl itme du‘âsın ‘aksin eyle  
Kerem kıl eyle it sultânım eyle

### **Behişt-i Pençüm**

- 637 Hudâvend-i hatâ-bahş u ‘atâ-dâd  
Ki ‘arş-ı a‘zama ol urdı bünyâd
- 638 Bir adı Müntakim bir adı Gaffâr  
Bir adı cür‘et-i a‘dâya Sabbâr
- 639 Mekân itdi bize rûy-ı zemîni  
Ser-âmed sâyebân çarh-ı berîni
- 640 Görinmez kendüsi illâ ki zâhir  
Niçe Zâhir ki günden nûrı bâhir
- 641 Kapusunda niçe sâ‘illeri var  
Velîkin bî-‘aded hâ‘illeri var
- 642 Biz ol kapuda bir kaç bî-nevâyuz  
Türâb-ı ‘acze yüz urmış gedâyuz
- 643 Ne sabr u ne tahammül var ne tâkat  
Degüldür kârumuz illâ hamâkat
- 644 Boyumuzca garîk-i ni‘metiyüz  
Harîk-i iştiyâk-ı rû‘yetiyüz
- 645 Yanar dillerde nâr-ı iftirâkı  
Uçar gözlerde nûr-ı iştiyâkı
- 646 Celâlinde cemâlin gizlemiştür  
Sülûk erbâbı anı izlemiştür
- 647 ‘Anâsı devlet ü ikbâlümüzdür  
Hakikatde belâsı balumuzdur
- 648 Şitâsınun soñında var bahârı  
Güle râgıb olan añar mı hârı

- 649 Çeker bir bendesini imtihâna  
İder eltâfına anı bahâne
- 650 ‘Aceb olmaz yüz urmak hâk-i râha  
Degül âsân irişmek pâdişâha
- 651 ‘Aceb olmaz gürisne teşne olmak  
‘Aceb olmaz cerîh-i deşne olmak
- 652 Halîle od ne vakt oldu gülistân  
Ne vaktin geldi İsmâ‘île kurbân
- 653 Belâ sabrı kavîler hâletidür  
Nebîlerle velîler hâletidür

### **Hikâye-i Latîfe**

- 654 Var idi sâbıkan bir ehl-i takvâ  
Mürâ‘îler gibi itmezdi da‘vâ
- 655 Salâh u zühd içinde kâmil idi  
Şerî‘at ‘ilmi ile ‘âmil idi
- 656 Fakîrû’l-hâl idi dünyâlığında  
Velî söz yog idi bînâlığında
- 657 Var idi niçe evlâd-ı sığârı  
Çekerdi anlaruñçün inkisârı
- 658 Giriftârı olup bâr-ı ‘ıyâlûñ  
Zebûn u zârı olmışdı melâlûñ
- 659 Elinde yog idi san‘at ki vara  
Vesîle ide anı kesb ü kâra
- 660 Riyâzetden cesâmet kalmamışdı  
Ten-i zârında tâkat kalmamışdı
- 661 Varup bâzâra olmag için ırgad  
Seherden kuşluga dek turdı ol râd
- 662 Bu idi kasdı kim bir ehl-i hâcet  
Anı ırgad idinüp vire ücret
- 663 Ki tâ vüs‘at gele el tarlığundan  
Kimesne tutmadı lâgarlığundan
- 664 Felek çünkim aña bu cevri itdi  
Gidüp andan bir akar suya yitdi



- 665 Güşâyîş bulmag için kâr-ı beste  
Mübâşir oldu gusl u âb-deste
- 666 Gice olunca ol sâhib-sa‘âdet  
Kenâr-ı âbda itdi ‘ibâdet
- 667 Şeb irdükde yöneldi hânesine  
Melahsuz murg gibi lânesine
- 668 Sevindiler üşüp başına evlâd  
Murâd üzre getürdi sandılar zâd
- 669 Tehî-dest idügi çün oldu ma‘lûm  
Kamusı oldılar mahzûn u magmûm
- 670 Tesellîler virüp ol hûb-sîret  
Didi bu şeb idüñ sabr u kanâ‘at
- 671 Ki hıdmet itdügüm kimse ganîdür  
Siz anı sanmañuz merd-i denîdür
- 672 Koyup ferdâya bugünkü nevâli  
Didi çekme sen anuñçün melâli
- 673 Yine yarın ecîr ol itme ihmâl  
Bir ugurdan iki günlük şikâr al
- 674 Bu söziyle tesellî buldı evlâd  
Seher oldukda turdı nitekim bâd
- 675 Yine bâzâra vardı zâr u gamgîn  
Münevver çihre zerd ü dîde nemgîn
- 676 Yine tutmadı kimse kâra anı  
Yine buldı varup âb-ı revânı
- 677 Yine anda idüp gusl ü tahâret  
Yine ahşama dek itdi ‘ibâdet
- 678 Yine geldi eve irdükde ahşam  
Yine ehl ü ‘ıyâli oldu nâ-kâm
- 679 Yine virdi cevâbı kim agamuz  
Kodı yarınki ahşama ‘atâmuz
- 680 Bize didi ki çün yarın ola şeb  
Bir ugurdan aluñ ücretleri hep
- 681 Bu sözi zevcesi çünkim işitdi  
‘Azîze dil virüp yavuz iş itdi

- 682 Didi yarın getürmezseñ eger nân  
Senüñle turmazın hâneñde bir ân
- 683 Nedür bu kim çekerüz ıztırâbı  
Ki cû‘uñ cânuma geçdi ‘azâbı
- 684 Yudup bu zehri ol pîr-i mü’eddeb  
Evinde subha dek sabr itdi ol şeb
- 685 Yine gayret idüp bâzâra vardı  
Yakasından seher çün ser çıkardı
- 686 Yine bir kimse alup i‘tibâra  
Anı tutmadılar ücretle kâra
- 687 Niçe tutsunlar ol pîr-i perîşân  
Kemâl-i za‘f ile olmışdı lerzân
- 688 Muhâlîf oldı çün tedbîre takdîr  
Kenâr-ı âba ‘azm itdi yine pîr
- 689 Yine buldı varup evvelki suyu  
Yine gusl eyledi alup vuzûyı
- 690 Yine leyle irince rûzgârı  
‘İbâdetde geçürdi ol nehârı
- 691 Bu cânibde olup gamdan diger-gûn  
Oturmışdı evi küncinde hatun
- 692 İderken devr elinden nâle vü âh  
Kapu kakdı gelüp bir kimse nâ-gâh
- 693 Elinde gördi bir zîbâ tabak var  
Anuñ üstinde bir kıymetlü destâr
- 694 Didi ol kimse itdi bunı irsâl  
Ki itdi dükeli kârına idhâl
- 695 Tutuñ şimdi hele bu nakdi ma‘zûr  
Bu bahşışdür degüldür ecr-i müzdûr
- 696 ‘İvaz şimden girü olsa gerekdür  
Dahı zevcûñ neler bulsa gerekdür
- 697 Didi dahı resûl oldı revâne  
Kodı ol kâse[y]i açup miyâna
- 698 Nazar itdi tabak içinde hatun

Konılmış üç yüz a‘lâ hâlis altun

- 699 Ferahnâk oldı şükr itdi Hudâya  
Esîr-i fakr iken irdi gınâya
- 700 Filori itdi anı şâd u handân  
Kenâr-ı âbda zevci perîşân
- 701 Talâk isterse benden gice ‘avret  
N’ola hâlüm diyü almışdı hayret
- 702 Nic’itsün âhir anı itdi tedbîr  
Gice enbânına kum toldura pîr
- 703 Vara geç vakt eve sordukda hatun  
Diye uşda getürdüm bir şinik un
- 704 Sabâh oldukda irken ola gâ’ib  
Ki def‘ ola bu lu‘b ile mesâ’ib
- 705 Hem eyle itdi dahı vardı gice  
Velî gördi ki hatunı behîce
- 706 Didi dilde neden oldı sürûruñ  
O yok bu yok nedür aslı gurûruñ
- 707 Didi sen ol ecîr olduguñ âdem  
Kerîm imiş bizi hep itdi hurrem
- 708 Ölince aña eyle hıdmeti sen  
Hele budur nasîhat saña benden
- 709 Beyân itdi gelen altunı bir bir  
Ferahdan ditredi endâmı dir dir
- 710 Didi Hak Hazretindendür bu in‘âm  
Pes itdi kendüñüñ ahvâlin i‘lâm
- 711 Dönüp didi yûri olup revâne  
Benüm enbânımı var dök yabana
- 712 Bu hâlet olmamagın baña ma‘lûm  
Senüñ havfuñla koymışdum aña kum
- 713 Varup enbânı hatun açdı bî-bâk  
Ta‘accüb itdi anuñ ‘aklını çâk
- 714 Nazar itdükde aña oldı ma‘lûm  
Ki bî-had incü olmuş andagı kum

- 715 Senâ vü hamdi mümtedd eylediler  
Hudâya şükri bî-hadd eylediler
- 716 Didiler ey kılan ma‘dûmı mevcûd  
Hakîkatde saña mahsûsdur cûd
- 717 Günin erbâb-ı fakruñ ‘îd idersin  
Dilerseñ rîgi murvârîd idersin
- 718 Bu söz mezkûr sözdür her zamânda  
Beleñe sabr iden kalmaz yabanda
- 719 Kim olmak istese makbûl-i dergâh  
İdinsün secde yirini nazargâh
- 720 Niçe yıllar tolaşmayan harîmi  
Haremde göremez şâh-ı kerîmi
- 721 Erenler itdiler terk-i gıdâyı  
Anuñla buldılar zevk u safâyı
- 722 İki günde bir itdiler sıyâmı  
Kimi üç günde bir yidi ta‘âmı
- 723 Kimi bir haftaya kimi bir aya  
Kimisi kırka çıkdı pâye pâye
- 724 Rivâyetdür dimişdür Sehl-i Tuster  
Ki oldur kasr-ı sıdka ferş-güster
- 725 Ta‘âm ekli komaz cismümde kuvvet  
Derûnum dahı eyler pür-kasâvet
- 726 Eger ekl itmesem kalbüm olur pâk  
Vücûdum dahı olur cüst ü çâlâk
- 727 Velî ol mertebe lâzım degüldür  
Ki gül hâr içre olsa yine güldür
- 728 Yidi içdi Resûl-i pâk-gevher  
Ledün ‘ilmin yine okurdi ez-ber
- 729 Bizümçün lîk sükkerler yimişdür  
Şibe‘den cû‘ yigrekdür dimişdür
- 730 Şikem pür-lokma olmakdan büyükdür  
Esîr-i nefis olan ma‘nâda segdür
- 731 Sabî gibi süd içün itme girye  
Sakin bu sözde yokdur reyb ü firye

- 732 Hatâsı var mı yohsa bu beyânuñ  
Yalan midur kelâmı enbiyânuñ
- 733 Geçersin mâl içün sahrâ vü deşti  
Görinmez gözine deryâ vü keştî
- 734 Gidersin gâh şarka gâh garba  
Uyup nefse agarsın dürlü sarpa
- 735 Seni halk eyleyen ey merd-i echel  
Yaratdı rızkuñı biş yüz yıl evvel
- 736 Tururken matlabuñ burnuñ dibinde  
Arayup ‘azm idersin Hind ü Sinde
- 737 Seni sen eyleme her yaña ‘âzim  
Yüri dergâh-ı Hakka ol mülâzım
- 738 Düriş şâm u seher savm u salâta  
Velî bakma aña bak seyyi’âta
- 739 Sevinme tâ‘ata terk-i gurûr it  
İderseñ bârî anuñla sürûr it
- 740 Yidi yüz yıl ‘ibâdet itdi iblîs  
Velî var idi çün tab‘ında telbîs
- 741 Anı ol pâyeden ‘azl itdi Bârî  
Neye irdi işitdün rûzgârı
- 742 Semend-i nefsi salsañ togrı yola  
Mukarrer sapmak ister saga sola
- 743 Zebûn oldum meded feryâd feryâd  
Îlâhî dâd elinden nefsumuñ dâd
- 744 İrişmezse eger cezbe kemendi  
Niçe zabt eyleyem ben bu levendi
- 745 Bükildi kâmetüm derd ü elemden  
Beni şirrîr nefis öldürdi gamdan
- 746 Demüm yâ Rab heder oldı diyet yok  
Hevâ bozdı mizâcum ‘afiyet yok
- 747 Kapuñda yâ Îlâhî Hind ü Sindüm  
Sivâdan el çeküp saña sığındum
- 748 Ne çâre başuma düşdi bir işdür

İlâhî tevbe vü tevîk irişdür

### Behişt-i Şeşüm

- 749 Hüve'l-Hayyu'llezî besse'l-halâyık  
Anuñ mesbûkıdur cümle levâhık
- 750 Hayâtı ol ider ihyâya i'tâ  
Aña mahsûsdur i'dâm u ihyâ
- 751 Anuñ makdûrıdur rûz-ı kıyâmet  
Çeker münkir olan yarın nedâmet
- 752 Kubûr ehlini yarın haşr ider ol  
'Amel defterlerini neşr ider ol
- 753 Bugünden eyleyen kimse hisâbın  
Ümîd oldur ki def' ide 'azâbın
- 754 Kişi şeytâna aldanmak gerekmez  
Cehennem odına yanmak gerekmez
- 755 Ne gurbet-hânedür bu dâr-ı dünyâ  
Ki magrûr ola aña merd-i bînâ
- 756 Göñül bunda 'abesdür bâğ u butsân  
Bekâ mülkinde hoşdur gül gülistân
- 757 Tekâlîfe boyun virmek gerek sen  
Er iseñ menzile irmek gerek sen
- 758 Niçe geçseñ gerek yarın Sırâtı  
Niçe bulsañ gerek sündüs bisâtı
- 759 Te'emmül eyleyen bulur tarîki  
İdinür hem-kadem hayrû'l-farîki
- 760 Cihâna niçe peygam-ber gelüpdür  
Fenâdan dehre âvâze salupdur
- 761 Nedür bu kârgâh-ı heft künbed  
Olur bir dem ki kalmaz bunda çesbend
- 762 Beşer etfâl iken âhir olur pîr  
Nazar kıl var ise idrâk ü tedbîr
- 763 Gülüñ evrâkı olmaz mı perîşân  
Anuñçün eylemez mi bülbül efgân
- 764 Nihâl iken ser-âmed olur eşcâr

Fenâya rihlet eyler âhir-i kâr

- 765 Nebât-ı tâze sebz ü hurrem olur  
İki gün geçse huşk u bî-nem olur
- 766 Bahâruñ âhiri irer hazâna  
Nazar kıl çeşm-i ‘ibretle cihâna
- 767 Yıkılması olur her bir binânuñ  
Cihânda niçesin gördüm ben anuñ
- 768 Harâb olmaz mı sanursın bu gerdûn  
Kalur mı olmayup hâli diger-gûn
- 769 Yapan yıkmaga kâdirdür bu kasrı  
Aña yokdur delîlüñ hadd ü hasrı
- 770 Eger vâzıh delîl isterseñ aña  
Beni diñle kulaguñ tut bu yaña

### **Hikâye-i ‘Üzeyr**

- 771 Düşüp sâbıkda dehre şûr u âsîb  
İdüpdî Buht-ı Nassar Kudsi tahrîb
- 772 Alup anda olan mâl u menâli  
Kırup ehlin komışdı anı hâlî
- 773 ‘Üzeyr adlu peyam-ber bir himâra  
Binüp ugradı nâ-geh ol diyâra
- 774 İnüp bagladı bir yirde himârın  
Girüp seyr itdi Kudsüñ her kenârın
- 775 Harâb olmuş yatur başdan ayaga  
Ne bustâna bakar kalmış ne bâga
- 776 Dıraht-ı mîvedâra yok nihâyet  
İder yok anlara hıfz u hırâset
- 777 Yitişmiş mîveler irmiş kemâle  
Kimi tâze kimi varmış zevâle
- 778 Çıkarmış kubbeler tâc-ı gurûrın  
Sücûd itmiş bilüp evler kusûrın
- 779 Binâlar yüz urup hâk-i huzû‘a  
Dıraht-ı mîvedâr inmiş rükû‘a
- 780 Kimesne yok karışmış hâke ecsâd

Kımıldar nesne yok anda meger bâd

- 781 Ne kendü var ne men‘i bâgbânuñ  
Seped toldurdi encîrinden anuñ
- 782 Varup soñra üzüm cem‘ itdi vâfir  
Yanında bir tulum var idi hâzır
- 783 Üzümden hem yidi hem şîre itdi  
Ta‘accüb ‘akl u fikrin tîre itdi
- 784 Toyınca içdi andan çünki toydı  
Kalanın şîrenüñ ol zıkka koydı
- 785 Gezerken bâğı esnâsında seyrüñ  
Bu geldi gönline nâ-geh ‘Üzeyrüñ
- 786 Ki varmışken bu meskenler harâba  
Karışmışken ahâlîsi türâba
- 787 Niçe ihyâ ider bunları Allâh  
Niçe ma‘mûre olur bu nazargâh
- 788 Bu fikr ile fevâkihden götürdi  
Varup ol kondugı yire oturdi
- 789 İrişdi gayreti Bâr-i Hudânuñ  
Gözin ol gûşede hâb aldı anuñ
- 790 Aña uyhu havâle itdi Kâdir  
Melekler kabz-ı rûha oldu hâzır
- 791 Anı yüz yıl imâte itdi anda  
Bu dahı bir mesel oldu cihânda
- 792 Düşüp hem kendü öldi hem himârı  
Velî kaldı şarâb ile simârı
- 793 Kalup nâzük teni toprag içinde  
Çürüyüp yatdı yüz yıl bâg içinde
- 794 Çü yüz yıl yirde yaturdı ‘Üzeyri  
Hudâ emr itdi cem‘ oldu gubeyri
- 795 Meşîyyetden çün irişdi işâret  
Harâb olmuş beden oldu ‘imâret
- 796 Yine yokdan vücûda geldi cismi  
Yazıldı defter-i ihyâya ismi



- 797 İrişdi rûhına emr-i İlâhî  
Ki gel vir mürde cisme intibâhı
- 798 Eñ evvel zinde itdi gözlerini  
Göre teninde ‘ibret yüzlerini
- 799 Ten-i bî-rûhını göziyle gördi  
Pes andan zinde olup öri turdı
- 800 Nidâ irdi ‘Üzeyre Hakdan ol dem  
Ki gûş it bu sözi ey merd-i ekrem
- 801 Ne mikdâr oldı eglenmek burada  
Ne deñlü yıl geçüp irdüñ murâda
- 802 Didi bir gün uyudumsa eger dün  
Eger bugün uyudumsa buçuk gün
- 803 Didi bir gün degül yüz yıl olupdur  
Gözüñ sûrâhına toprak tolupdur
- 804 Seni ben hâb-ı mevt ile uyutdum  
Şarâbuñla ta‘âmuñ tâze tutdum
- 805 Nazar eyle eser var mı haruñdan  
Gider inkârı havf eyle serüñden
- 806 Tagılmışdı hımârınuñ ‘ızâmı  
Tururdı zîn ile ammâ licâmı
- 807 Yakın geldi kemikler bir birine  
Segirdüp vardılar yirlü yirine
- 808 Büridi et soñında üstühânı  
Ki Bârî eyle emr itmişdi anı
- 809 Tamâm oldukda et cild oldı zâhir  
Aña inkâr idenler oldı kâfir
- 810 Pes andan cân gelüp itdi sirâyet  
Ola tâ haşr-i ecsâda bir âyet
- 811 Tenine çün haruñ rûh oldı lâhık  
Yirinden turı geldi oldı nâhık
- 812 ‘Üzeyr ol hâlete çün nâzır oldı  
Hemân dem i‘tizâra hâzır oldı
- 813 Didi her şey’e kâdirsin İlâhî  
Dilerseñ ‘afv idersin her günâhı

- 814 ‘Üzeyr andan rükûb idüp hımâra  
Teveccüh itdi kim kûyna vara
- 815 Hemân olup mübâşir reft ü pûya  
Hımârıyla gelür togduğı kûya
- 816 Görür ehli anuñ evvelkiden çok  
Velîkin içlerinde bildüğü yok
- 817 Gelür âhirle kendü hânesine  
Ki kona kendünüñ kâşânesine
- 818 Çıkar bir pîre zen a‘mâ vü a‘rec  
Kuvâ za‘findan olmış her yiri kec
- 819 Didi kimsin didi kim ben ‘Üzeyrüm  
Beni şer sanmañuz ben mahz-ı hayrum
- 820 ‘Üzeyr ismin işitdi çünki karı  
Didi kizb itdi bak bu yâdigârı
- 821 Buradan ol gidelden yüz yıl oldı  
Anı bir kimse hîç bilmez ki n’oldı
- 822 İrüpdi yüz yigirmi yaşa ol zen  
‘Üzeyri görmüş idi küçük iken
- 823 Beyân itdi ‘Üzeyr ahvâli aña  
Didi ger sâdık iseñ söyle baña
- 824 ‘Üzeyrün bir beñi var idi tende  
Dürûguñ yok ger ol var ise sende
- 825 Du‘âsı dahı makbûl idi anuñ  
Kamu maksûdı mahsûl idi anuñ
- 826 Du‘â eyle n’ola geçdiyse çağum  
Gözüm görsün sahîh olsun ayagum
- 827 El açup itdi Hakka ‘arz-ı hâcet  
Hemân ol dem murâdın virdi Hazret
- 828 Gözi açıldı sag oldı ayagı  
Yine bir âdem oldı basbayagı
- 829 Soyındı gördiler cisminde hâli  
Bilüp şâd oldılar ol hoş-hısâli
- 830 Zuhûra geldi çün bu şân-ı mestûr

Kamu halk arasında oldu meşhûr

- 831 Gelüp etrâfdan halk-ı vilâyet  
Niçe gün anı itdiler ziyâret
- 832 Olup kavm ü kabîle şâd u handân  
Ziyâfet itdiler mânend-i mihmân
- 833 Bize pend ü nasîhatdür bu kıssa  
Alur bundan basîret ehli hisse
- 834 Bu kıssa kudret-i Hakdan eserdür  
Kıyâmetden bize vâzıh haberdür
- 835 Egerçi ümmet-i âhir zamânuz  
Velî şâyeste-i emn ü amânuz
- 836 Sevâbıkda olan evzâ‘ u ahvâl  
Olurmuş lâhikûna reh-ber ü dâl
- 837 Bize ahvâl-i pîşîn oldu ‘ibret  
Bilür bu ma‘nîyi erbâb-ı hayret
- 838 Anuñçün soñra geldük biz kamudan  
Ki âzâd olavuz yarın tamudan
- 839 Mukaddem gelmeden mahrûmeyüz biz  
Anuñçün ümmet-i merhûmeyüz biz
- 840 Ki üç bölde bizi Kur’ân-ı mu‘ciz  
Anuñla iftihâr itsek n’ola biz
- 841 Ol üç sınıfuñ birisi sâbıkûndur  
Birisi muktesıd bir pâre dündur
- 842 Birisi nefsine zâlim olandur  
Ümîd-i ‘afv ile sâlim olandur
- 843 Üçümüz dahı erbâb-ı safâyuz  
‘İbâdu’llâh içinde mustafâyuz
- 844 Tevâtürle selefden geldi âsâr  
Ki itmişken ‘Üzeyri mürde Kakhâr
- 845 Yine ihyâ idüp cân virdi aña  
Kemâl-i ‘ilm ü ‘irfân virdi aña
- 846 Selef kavlin koyalum hey Müselmân  
Şehâdet itdi aña nass-ı Kur’ân

- 847 ‘Ukûl-i müşrikîne haşr-i ecsâd  
Gelürmiş bir dürûg-ı süst-bünyâd
- 848 Anı anlar muhâle haml idermiş  
Firîb ü mekr ü âle haml idermiş
- 849 Perîşân eyleyüp ‘azm-ı remîmi  
‘İyân itmişler inkâr-ı ‘azîmi
- 850 Dimişler hîç bu vara cem‘ ola mı  
Yine insân olup sûret bula mı
- 851 Bunı itmezmiş ol ahmaklar idrâk  
Ki kudret sâhibidür Îzîd-i pâk
- 852 Gör a ol kavm-i bî-‘akl u sebâtı  
Vukû‘a gelmiş iken mümkinâtı
- 853 İdüp şeytân gibi envâ‘-ı hîle  
Kıyâs eylerler imiş müstehîle
- 854 Yog iken evvelinde lahm u ‘azmi  
Yaradup virdi a‘zâsına nazmı
- 855 Görinmezse göze ger bâd u âbı  
Mezârında hele var a türâbı
- 856 İlâhî çünki virdüñ ‘akl u idrâk  
Bizi âhir nefesde itme ihlâk
- 857 İdüp tevhîdüñi fazluñla ihsân  
Bizi çün eyledüñ ol gevhere kân
- 858 Kerem kıl anı bizden itme zâyî‘  
Revâ görme ki ola gayr-ı nâfî‘

### **Behişt-i Heftüm**

- 859 Kerîm oldur ki uymaz intikâma  
Kerâmetler hibe eyler kirâma
- 860 Be-gâyet gerçi ‘âlîdür cenâbı  
Açıkdur ihtiyâc ehline bâbı
- 861 Bilen anuñ harîmi hürmetini  
Bilür cânına minnet hıdmetini
- 862 Sa‘âdet aña hıdmet eylemekdür  
Her emrine itâ‘at eylemekdür

- 863 Seher-hîz oldu her kim hıdmetinde  
Safâ şem‘in uyardı halvetinde
- 864 Şu kim fermânına gerden virüpdür  
İki ‘âlemde maksûda irüpdür
- 865 Niçe irdi murâdına irenler  
Ne yol ile girer hulde girenler
- 866 Göñül geçmek gerek hırs u hevâdan  
Erenler el çeküpdür mâ-sivâdan
- 867 Gurûra virmesün lezzât-ı dünyâ  
Sakın bu çâhdan olduñsa bînâ
- 868 Şu kim açdı tevekkül bâdbânın  
İletdi sâhil-i maksûda cânın
- 869 Hilâf itmek gerek nefsine âdem  
Aña tâ feth ola bir özge ‘âlem
- 870 Ki her kim terbiyet eylerse rûhı  
Bulur ervâhdan feth ü fütûhı
- 871 Niye geldi bu fânî dehre insân  
Bekâ mülke geçüpdür bu beyâbân
- 872 Dürîş leyl ü nehâr ezkâr-ı pâke  
Yüzüñ ur âsitân-ı Hakda hâke
- 873 Gice tâ subha dek nâlân u giryân  
Yanup olmak gerek şem‘-i şebistân
- 874 Vücûdın mahv iden irdi murâda  
Tekebbür ehli ‘ömrin virdi bâda
- 875 Biş on yıl ‘ömre aldanmak gereksüz  
Anuñçün odlara yanmak gereksüz
- 876 Eger ‘âlemde bulsañ her murâduñ  
Cihânuñ pâdişâhı olsa aduñ
- 877 Zamân-ı ‘izzetüñ bir âna degmez  
Soñında çekdüğüñ hicrâna degmez
- 878 Cihânuñ zevki sanma mu‘teberdür  
Cihân reh-revlere zıll-i şecerdür
- 879 Kuluz ammâ ki kullık bu degüldür  
Sefer ser-mâyesi uyhu degüldür

880 Bilenler ‘izzet-i dünyâyı zillet  
Bekâ mülkinde buldı evc-i ‘izzet

881 Cihânı terk iden cânâ irişdi  
Niçe cân bezm-i cânâna irişti

### **Hikâye-i Münâsibe**

882 Hikâyetdür dimişdür İbn Fârız  
Baña şûrîdelik olurdu ‘ârız

883 Pederden varup alurdum icâzet  
İderdüm taşrada seyr-i vilâyet

884 Olurdum Mısruñ etrâfında gerdân  
Gezerdüm gûşelerde mest ü hayrân

885 Bir iki gün gezerdüm kûh u deşti  
İderdüm dürlü vâdîlerde geşti

886 Revân olup peder yanına gâhî  
Gelüp rûyına eylerdüm nigâhı

887 Kılurdum hâtırın anuñ ri‘âyet  
İderdüm kâdir oldugumca hıdmet

888 İcâzetle yine varur giderdüm  
Yine etrâf-ı Mısır geşt iderdüm

889 Peder çün göçdi bu dârü’l-fenâdan  
Göñül sır oldu yad u âşinâdan

890 Varup oldum tarîk-i Hakka sâlik  
Ki oldur ‘âkile hayru’l-mesâlik

891 Mücidd olup niçe dikkatler itdüm  
Cihândan el çeküp ‘uzletler itdüm

892 Ne deñlü cidd ü cehd itdümse anda  
Kapu açılmadı kaldum yabanda

893 Revân oldum medârisden birine  
Ki anda tâlib oldum ‘ilm-i dîne

894 Kapusunda anuñ bir pîr bakkâl  
Namâz içün vuzûya itmiş ikbâl

895 Ayagın yudı evvel soñra yüzün  
Ne bakdı kimseye ne açdı gözün

- 896 Vuzû tertîbini ‘aksine itdi  
Derûn-ı sînem aña kîne itdi
- 897 Ta‘accüb eyledüm göñlümnden anı  
Ki almış yaşın olmuş pîr-i fânî
- 898 Yanında medrese bilmez vuzûyı  
Döker isrâf ile a‘zâya suyu
- 899 Hitâb itdi baña ol pîr nâ-gâh  
Ki saña bunda feyz olmaz ol âgâh
- 900 Yüri var Mekkeye fethüñ yakındur  
Sözüm zannî degül ‘ayne’l-yakîndür
- 901 Yüri turma ki irmişdür zamânuñ  
Ki sen kutbı olursın bu cihânuñ
- 902 Veliyyu’llâh imiş ben anı bildüm  
Göñülde şûriş-i inkârı sildüm
- 903 Murâdı setr-i hâl imiş degül cehl  
Cihânda yog imiş anuñ gibi ehl
- 904 Didüm yâ seyyidî itdün beşâret  
Velî müşkil görindi bu işâret
- 905 Sözüñe i‘tikâd itdüm ki hakdur  
Ne assı Mısrda Mekke ırakdur
- 906 Ne mevsimdür ne kudret var refîka  
Ne bir kimse delîl olur tarîka
- 907 Eliyle Mekke[y]i gösterdi baña  
Nazar kıldum dü dîdemle ben aña
- 908 Revân oldum idüp pîre vedâ‘ı  
Giderken yolda eylerdüm semâ‘ı
- 909 Harîme irgürünce râhı sâ‘ib  
Nazardan Ka‘be hiç olmadı gâ‘ib
- 910 İrişdükde hemân Beytû’l-Harâma  
Açıldı kutlu kapu ben gulâma
- 911 ‘Înâyet yilleri esmekde oldı  
Dimâg-ı câna vuslat bûyı toldı
- 912 Dil ü cânum irüp zevk ü sürûra

Vücûdum ser-te-ser gark oldu nûra

- 913 Seyâhat eyleyüp her bir yirinde  
Gezerdüm Mekkenüñ vâdilerinde
- 914 İdüp bir yirde âhirle ikâmet  
Tavattun eyledüm bir niçe müddet
- 915 Ger ihmâl itmeyüp bir kimse gitse  
Revişde her ne deñlü sür‘at itse
- 916 İkâmet itdügüm yirden muhakkak  
Varurdı Ka‘beye on günde ancak
- 917 Baña her gün ol on günlük mesâfe  
Hicâb olmazdı biş kerre tavâfa
- 918 Alup âb-ı revân ile vuzûyı  
Namâza gitmege tutdukça rûyı
- 919 Gelürdi bir ‘aceb şîr-i dil-âver  
Baña olmag içün yolumda yâver
- 920 Deve gibi yanumda hâzır idi  
Çöküp “Yâ seyyidî irkeb” dir idi
- 921 Aña ben itmez idüm iltifâtı  
Yayan varur kılurdum her salâtı
- 922 Varurdum Ka‘beye bir kaç kademde  
Kılurdum biş namâzı ben Haremde
- 923 Bunuñ üstine on biş sâl geçdi  
Arada çok ‘aceb ahvâl geçdi
- 924 İrişdi pîr bakkâluñ nidâsı  
Kulagum toptolu itdi sadâsı
- 925 Didi kıl yâ ‘Ömer Mısra ‘azîmet  
Ki ben itsem gerek ‘ukbâya rihlet
- 926 Gelüp yanumda hâzır ol benüm sen  
Ki muhtâcum vasiyyet itmege ben
- 927 İşıtdüm çün bu âvâzı Haremde  
İrişdüm Mısra bir iki kademde
- 928 Girüp gördüm ki olmuş muhtazar pîr  
Ecel câmını sunmış dest-i takdîr



- 929 Gözüm toldı idüp aña terahhum  
Velî ol tınmayup itdi tebessüm
- 930 Yanında var imiş bir kaç filori  
Virüp baña didi gör bu umûrı
- 931 Bunı lâzım ne ise aña harc it  
Yuyup cismüm kefenler içre derc it
- 932 Koyup tâbûta götürsün erenler  
Bu altundan vir anlara birer zer
- 933 Fülân yirde koyup eyle tevakkuf  
Gelince anda bir sâhib-tasarraf
- 934 Kılûñ anuñla ol yirde namâzum  
Benüm saña budur nâz u niyâzum
- 935 Çün itdi baña bu üslûbı ta‘lîm  
Hemân dem ol arada oldı teslîm
- 936 Vasiyyetden ne emr itdiyse ol pîr  
Aña ben dahı itdüm hüsn-i tedbîr
- 937 Ne ise maslahat ser-cümle gördüm  
Koyup ol yirde tâbûtını turdum
- 938 Yanında muntazır olup tururken  
Gelür ol kimse gördüm bir taraftan
- 939 Ayag altına almış deşt ü tagı  
Yire basduğı görünmez ayagı
- 940 Velî gördüm gelen bir merd-i mecnûn  
Nazarda sûret ü hâli diger-gûn
- 941 Gezerdi sâbıkan Bagdâd içinde  
Gehî sahrâda geh bünyâd içinde
- 941 Sokaklarda dem-â-dem vâlih ü lâl  
Ururdi eñsesine sille etfâl
- 942 Gelüp çün ol kimesne oldı hâzır  
Hemân olduk namâzına mübâşir
- 943 Namâzına turalum dirken anuñ  
Yeşil kuşlar yüzün tutdı hevânuñ
- 945 Bizümle eyleyüp Hakka niyâzı  
Bile kıldı inüp anlar namâzı

- 946 Biri ol kuşlaruñ gördüm ki geldi  
Aradan çıkdı tâbûta yöneldi
- 947 Yutup anı yine oldu revâne  
Uçup gitdiler evc-i âsumâna
- 948 Bakup hem-râhuma didüm nedür bu  
Didi bilmez misin ol kıssadur bu
- 949 Ki Peygam-ber buyurmuşdur haberde  
Şehîd olan kişi gitdükde yurda
- 950 Bulup cennetde envâ'-ı fütûhı  
Yeşil kuşlar içinde ola rûhı
- 951 Yaturken mahbes-i berzahda mahlûk  
Ola anlar cinânda hayy u merzûk
- 952 Şehîd-i seyf olanuñdur bu devlet  
Anuñdur Hak katında bu kerâmet
- 953 Velî şol kim virüp cân-ı sa'îdi  
Ola 'ışk-ı İlâhînuñ şehîdi
- 954 Olur ol dahı anlarla ber-â-ber  
Aña dahı nasîb olur bu gevher
- 955 Ezel ben dahı anlardan olupdum  
Mahabbet ehli teşrîfin bulupdum
- 956 Dilümden bir rekâket sâdır oldu  
Ki ehl-i diller içre nâdir oldu
- 957 Anuñçün cevır ider şimdi gabîler  
Ururlar eñseme sille sabîler
- 958 Aña kâdir durur ol Hayy u Sübhân  
Ki Firdevsi bula dünyâda insân
- 959 Bu 'âlem aña ola gül gülistân  
Gele her gûşesinden bûy-ı reyhân
- 960 Ola Kevser şarâbı içdüğü su  
Zeheb fidda ola her burc-ı bârû
- 961 Yidüğü ni'met-i 'Adn ola anuñ  
Ola sad sâle bir ânı zamânuñ
- 962 Has u hârı cihânuñ gül görine

Giyâhı deste-i sünbül görine

- 963 Melek-haslet görine halk-ı ‘âlem  
Dilinde zerre deñlü olmaya gam
- 964 İden sa‘y ile tebdîl-i zemâ’im  
Olur bu didüğüm hâl üzre dâ’im
- 965 Bu hâli bunda tahsîl itmek olur  
Kişi nefisini tekâmîl itmek olur
- 966 Şuña kâbildür insân kim açup per  
Çıkup seyr eyleye çarhı ser-â-ser
- 967 Cihân fahrınıñ ey merd-i mükerrerem  
Ziyâretgâhı oldu ‘arş-ı a‘zam
- 968 Niçe yıllar felekde oldu İdrîs  
İnüp ‘ilm-i nücûmı itdi tedrîs
- 969 Hilâf itmek ‘inâd olmaz mı mahzâ  
Degül mi çarh-ı çârumda Mesîhâ
- 970 Eger dirse hilâf idüp gabîler  
Bizüm gibi degüllerdür nebîler
- 971 Çıkan anlar durur ancak sipihre  
Sühâ olmaz mu‘âdil mâh u mihre
- 972 Sözi gerçektür ammâ sen velî ol  
Muhammedden kemâl ahz it ‘Alî ol
- 973 Vefâ-zâde uzadup bir ayagın  
Solın farz eyle sen anuñ ya sağın
- 974 Dimiş bir münkire gördüñ mi şunu  
Bu şeb tokuz tolandı çarh-ı dünü
- 975 Hemân himmet gerekdür âdemîde  
Ki bir şey’ yokdur insândan güzîde
- 976 Ne ister bir kişi dünyâ-yı dündan  
Ki gelmez âdeme yardım zebûndan
- 977 Küdûretten degül hâlî safâsı  
Cefâdur ma’nîde mihr ü vefâsı
- 978 Çü tâbistân ire dehrüñ nesi var  
Sovuk suyıla koyu gölgesi var

- 979 Zemistânda nedür âteş kenârı  
Bir eyler âdeme leyl ü nehârı
- 980 Ko anı ni‘metüñ a‘lâsın iste  
Nefîsin nâzükin ra‘nâsın iste
- 981 İlâhî bilmezem kanda varayın  
Saña ben ne dil ile yalvarayın
- 982 Kapuñı günlerin çirkin yüzümden  
İşigüñ hâkini kendü gözümden
- 983 ‘Înâyet eyle sultânum zebûnam  
Giriftâr-ı kemend-i nefîs-i dûnam

### **Behişt-i Heştüm**

- 984 Cemîl oldur ki bâkîdür cemâli  
Cemâli nûrınıñ yokdur zevâli
- 985 Cemâli rûh-bahş-ı ma‘nevîdür  
Celâli kudreti gibi kavîdür
- 986 Murâd itse denî eyler celîli  
Hem isterse ‘azîz eyler zelîli
- 987 Küdûretten musaffâ olsa bir dil  
Hemân ancak olur dîdâra mâ’il
- 988 Kişi dünyâda sa‘y itmek gerekdür  
Yoluñ togrısına gitmek gerekdür
- 989 Şebüñ rûzı şitânuñ yazı vardur  
Bekâmuzda fenâ âvâzı vardur
- 990 Havâdis seyli ma‘nîde taşupdur  
Belâ emvâcı başlardan aşupdur
- 991 Cihânda himmet-i nefsüñ denîdür  
Ya dahl-i batn u ya harc-ı menîdür
- 992 Gabîdür aldanan dârü’l-gurûra  
Ki nisyân perdesin çekdi mürûra
- 993 Zen-i dünyâ be-gâyet bî-vefâdur  
Göñül virmek aña bâtıl hevâdur
- 994 Mahabbet itdi her kim enbiyâya  
Mukayyed olmadı sûrî gınâya

- 995 ‘Alâkañ var ise dîn-i mübîne  
Yüri vir göñlüñi Hak sevdüğine
- 996 Olup dîdâra ‘âşık âb gibi  
Resûlu’llâhı sev ashâb gibi
- 997 Anuñçün gözlerüñ yaşın revân it  
Anuñ şevkiyle feryâd u figân it
- 998 Sevenlerden anı pîr ü cevânda  
Kimesne kalmadı ey dil yabanda
- 999 Tufûliyyet zamânında Ebû Bekr  
Anı sıdk ile sevmişdi bilâ-mekr
- 1000 Anuñçün ehl-i dîne oldu server  
Dinildi adına Sıddîk-i Ekber

### **Hikâye-i Râsıha**

- 1001 Meger ol vakt idi kim Fahr-ı ‘Âlem  
Ki oldur seyyid-i evlâd-ı Âdem
- 1002 Yetişmiş serv-kâmet olmuş idi  
Kıyâmetden ‘alâmet olmuş idi
- 1002 Tufûliyyet demi olmuşdı âhir  
Cevânlık ‘âlemi olmuşdı zâhir
- 1004 Yaşı sinn-i bülûga ırmış idi  
Yüzi dehre ziyâlar virmiş idi
- 1005 Cebîninde olan nûr-ı İlâhî  
Güneş yanında şem‘ itmişdi mâhı
- 1006 Ayuñ on dördi aña reşk iderdi  
Gözin ‘âşıklarüñ pür-eşk iderdi
- 1007 ‘Îzârı cânda âteşler yakardı  
Göñüller aña su gibi akardı
- 1008 Meger gencîne-i nûr idi cismi  
İki kaşı iki tîg-i tılsımî
- 1009 Kemân ebrûsınuñ müjgân hadengi  
Gözi şeh-bâzınuñ diller külengi
- 1010 Ne boynı gibi bir gerden görilmiş  
Ne gîsûsı gibi turra örilmiş

- 1011 Güzel gözler bakışda nâvek-endâz  
Yaraşmış haste çeşme ‘işve vü nâz
- 1012 Kelâmı kıymeti yigrek güherden  
Dehânı lezzeti teng-i şekerden
- 1013 Cihân halkını hulkı kul idüpdi  
Kamu evzâ‘ını makbûl idüpdi
- 1014 İrişmişdi basît-i hâke nâmı  
Zen ü merd anuñ olmışdı gulâmı
- 1015 Yeñile olınap Sıddîk-i Ekber  
Mübârek bâd içün gelmişdi iller
- 1026 Karada sâkin olan akrabâsı  
Gelüpdi merd ü zenden çok ünâsı
- 1027 Ulu cem‘iyyeti var idi anuñ  
Ki sâdâtından idi ol zamânuñ
- 1028 Kamusı ittifâk itdi ki Sıddîk  
Geçürür söz Habîb-i Hakka tahkîk
- 1029 Kulakdan aña olmuşlardı ‘uşşâk  
Yüzini görmege cân ile müştâk
- 1020 Didiler pes Ebû Bekre ki vara  
Yüz urup yalvara ol bahtiyâra
- 1021 Gele bu cem‘a ol ferhunde ahter  
Ola ol meclise şem‘-i münevver
- 1022 Görüp şâd olalar dîdârın anuñ  
Dehenden alalar güftârın anuñ
- 1023 Ebû Bekr ol mahalde fikre taldı  
Habîbe evvelâ ‘Ammârı saldı
- 1024 Didi ‘Ammâra var benden Resûle  
Elin öp söyle ol aslu’l-usûle
- 1025 Sürüp anuñ öñinde hâke yüzüñ  
Tazarru‘ kıl ola kim tuta sözüñ
- 1026 Gele ben bendesin kılmaya mahzûn  
Ola burc-ı şerefde baht[1] efzûn
- 1027 Varup ‘Ammâr-ı Yâsir itdi minnet  
Didi ey baht-ı bîdâr eyle himmet

- 1028 Beni itme bu bâzârumda hâsir  
Esîr olsun saña ‘Ammâr-ı Yâsir
- 1029 Kerem kıl gel seni okur Ebû Bekr  
Ziyâfetdür degüldür hîle vü mekr
- 1030 Yüzin hâke urup itdi tevâzu‘  
Muhassal itdi envâ‘-ı tazarru‘
- 1031 Biraz nâz eyledi ol nûr-ı bâhir  
Tebessüm gösterüp meyl itdi âhir
- 1032 Ebû Tâlib evine vardı ol ân  
Didi ben oluram Bû Bekre mihmân
- 1033 Ebû Tâlib degüldi evde ol gün  
İcâzet virmege havf itdi hatun
- 1034 Didi ‘ammuñ buña kâ’il degüldür  
İnanmaz kimseye kâbil degüldür
- 1035 Seni ol kıskanur iki gözinden  
Niçe mekr ehli var açmaz yüzinden
- 1036 Didi yâr-ı ‘azîzümdür benüm ol  
Degüldür aña mekr isnâdı ma‘kûl
- 1037 Virüp aña cevâb-ı bî-hatâsın  
Soyındı geydi seyyidler libâsın
- 1038 Gül-âb ile yudurup ser tırâşa  
Kodı destâr-ı İbrâhîmi başa
- 1039 Kemer kim ceddi İsmâ‘îlüñ idi  
Biline bend idüp ‘Ammâra didi
- 1040 Gel imdi öñüme düş geldi ‘Ammâr  
Pes itdiler Haremden yaña refîâr
- 1041 İşidüp anı Sıddîk oldu mesrûr  
Didi oldu işüm nûrun ‘alâ nûr
- 1041 Haremden yaña geldi sür‘at ile  
Selâm itdi Habîbe ‘izzet ile
- 1043 Öñine düşdi anı aldı gitdi  
Varup kasr-ı mu‘allâsına yitdi
- 1044 Kamu anda olanlar karşı çıkdı

Bu hâlet düşmenüñ 'ırzını yıkdı

- 1045 Kimi öpdi elin kimi ayagın  
Gelüp gördiler ol gözler çerâgın
- 1046 Alup sadra geçürdiler Resûli  
Kamusı oldılar kurbân u kuli
- 1047 Kelâm-ı cân-fezâsın diñlediler  
Añup furkat zamânın iñlediler
- 1048 Toyınca bakdılar zîbâ cemâle  
Didi her birisi tahsîn kemâle
- 1049 Habîbüñ her biri kadrini bildi  
Nefâ'is bezl olup yindi içildi
- 1050 Tamâm oldu ziyâfet emri âhir  
Gider oldu eve ol nûr-ı bâhir
- 1051 Aña on dâne dîbâ sad 'aded zer  
Virüp 'özü eyledi Sıddîk-i Ekber
- 1052 Götürdi anları 'Ammâr-ı Yâsir  
Bile yanınca Sıddîk-i mu'âsır
- 1053 Yöneltiler Ebû Tâlib evine  
Ola kim bunları görüp sevine
- 1054 Ebû Tâlib eve geldükde gördi  
Habîb anda görünmez anı sordı
- 1055 Didi hatunına kanı Muhammed  
Niçe oldu görünmez ancak Ahmed
- 1056 Didi hatun ki ol Bû Bekre gitdi  
Anı ol hânesine da'vet itdi
- 1057 Bu sözden oldu gâyetde gazabnâk  
Yakın kaldı ki ola zehresi çâk
- 1058 Hayâl itdi ki sûretdür Ebû Bekr  
Aña oldu 'adûdan hîle vü mekr
- 1059 Didi hatunına dil-teng ü gamgîn  
Bize kalbünüde var imiş gibi kîn
- 1060 İcâzet vir diyü kim didi saña  
Niçün sen mâni'a olmaduñ aña



- 1061 Anuñ yokdur hasûdına nihâyet  
‘Adûdur aña erbâb-ı habâset
- 1062 Didi hatun ki Ahmed müstakildür  
Tedâbîrinde ‘âkiller hacildür
- 1063 Ki şimdi ol cevân oldu degül tıfl  
Aña şimden girü lâzım degül kufl
- 1064 Ne üstür kim murâd itse urur raht  
Beni esler mi sanduñ ol cevân-baht
- 1065 Haber idüp hemân kardaşlarına  
Kasem yâd itdi başlu başlarına
- 1066 Ki cem‘ oluñ alay ile varalum  
‘Adûlardan Habîbi kurtaralum
- 1067 Birâderler kamu Hamza vü Hâris  
Dahı kim var ise anlara vâris
- 1068 Binüp ata kuşandılar silâhı  
Göreler niçedür emrûñ salâhı
- 1069 Giderken sür‘at ile yolda nâ-gâh  
Gelür Sıddîk ile gördiler ol şâh
- 1070 Ebû Tâlib inüp ol dem atından  
Varup aldı Ebû Bekrûñ katından
- 1071 Hemân bagrına basdı ol Habîbi  
Didi ey haste göñlümüñ tabîbi
- 1072 Seni ben görmesem yanumda bir ân  
Olur dünyâ benüm başuma zindân
- 1073 Ebû Tâlibde çün gördi bu hâli  
Bu oldu anda Sıddîküñ makâli
- 1074 Ki kasd iden bu cânler pâresine  
Devâ bulmaya bagrı yarasına
- 1075 Ebû Bekrûñ görüp bu ıztırâbın  
Tesellî eyleyüp virdi cevâbın
- 1076 Didi senden degüldür ihtirâzum  
‘Adû mekrindedür fikr-i dırâzum
- 1077 Beni sanma ki senden korkaram ben  
‘Adûlar vardur andan korkaram ben

- 1078 ‘Umûman ‘ammîler kavm u kabîle  
İdüplerdi mahabbet ol cemîle
- 1079 Sakındılar anı günden güneşden  
Sovukdan ıssıdan cû‘ u ‘ataşdan
- 1080 Nübüvvet kudretin görüp kolında  
Anuñ cânlar eritdiler yolında
- 1081 ‘Aceb mi itseler ‘ışkına ragbet  
Cihânda aña lâyıkdur mahabbet
- 1082 Kerem kânı mürüvvet ma‘dinidür  
Aña âşüfte olmayan denîdür
- 1083 Sev anı âl ü ashâbın dahı sev  
Kamu ahbâb u ensâbın dahı sev
- 1084 Mahabbet sanma da‘vâ-yı zebândur  
Mahabbet dilde bir sûz-ı nihândur
- 1085 Ne dilde kim mahabbet olsa peydâ  
Olur şâm u seher nâlân u şeydâ
- 1086 Yalan da‘vâyı ko geç sû’-i zandan  
Anuñ ‘ışkını sor Veyse’l-Karândan
- 1087 Ki ol kutb-ı velâyet gavs-i ümmet  
Aña sıdk ile itmişdür mahabbet
- 1088 Göñülde hâlis olmanın vidâdı  
‘İyân itdi kemâl-i inkıyâdı
- 1089 Derûnında mahabbet tohmin ekdi  
Ne deñlü dişleri var ise çekdi
- 1090 Habîbe mübremin irüp kazânuñ  
Gazâda bir diş çıkmışdı anuñ
- 1091 Anuñ ta‘yînine olmadı imkân  
Anuñçün komadı agzında dendân
- 1092 Ki çün hep çıkmada olmaya ihmâl  
Biri ol olur elbetde beher hâl
- 1093 Hakîkatde budur gerçi mahabbet  
Velî bir kimsede yokdur bu himmet
- 1094 İlâhî ol Habîbüñ hürmetiyçün

Za‘îf ümmetlerine himmetiyçün

1095 Ne deñlü pür-cerâ‘im ümmet isek  
Mahabbetde dahı dñn-himmet isek

1096 Bize fazluñla kıl yarın tecellî  
Kemâl-i ‘afvuñ ile vir tesellî

### **Hâtimetü’l-Kitâb**

1097 Hudânuñ fazlıdur bu nazm u tertîb  
Buña lâzım degüldür nakş u tezhîb

1098 Nasihatdür garaz şöhret degüldür  
Gereklü ma‘nîdür sûret degüldür

1099 Edâ-yı hûb ile ma‘nâ-yı rengîn  
Yiter lâzım degüldür gayrı tezyîn

1100 Haberdâr olmayanlar mesnevîden  
Za‘îfin añlamaz anuñ kavîden

1101 Ma‘ânîde degül sanur belâgat  
Bedî‘a sa‘y idüp eyler hamâkat

1102 Olur inşâdı nâ-merbût u bî-rûh  
Gelür mîzân-ı zevka zîşt-i mercûh

1103 Bu söz mensûhdur nâsih katında  
Velî makbûldür râsih katında

1104 Lezîz olmaz iñen hâm olsa mîve  
Yaraşmaz şekl-i zîşte nâz u şîve

1105 Söz oldur kim ola gül gibi hoş-bû  
Selâsetde dahı gûyâ akar su

1106 Hoş-âyende gerek nazm-ı güher-bâr  
Degül matbû‘amuz nâ-puhte güftâr

1107 Şu kim fazlın irişdürdi kemâle  
Ki aña armagandur bu risâle

1108 Hüner ehline ol bâtıl söz atmaz  
Ne deñlü kâsır olsa dil uzatmaz

1109 Velî nâ-dâna lâzımdur bu hâlet  
Ki görse bir kelâm-ı pür-letâfet

1110 Hayâlâtı ne deñlü olsa ince

Begenmez anı zu‘m-ı fâsidince

- 1111 Sürer harcar derûndan türrehâtın  
Çıkarur gizlü habsinüñ zekâtın
- 1112 Ma‘âza’llâh bize anı gerekmez  
Ki insâfı olan ol tohmı ekmez
- 1113 Bizi sen mu‘tedil eyle İlâhî  
Gözümüzden güm itme togrı râhı
- 1114 Bu garrâ nüsha kim peydâ olupdur  
Latîf ü nâzûk ü ra‘nâ olupdur
- 1115 Senüñ lutfuñla gelmişdür zuhûra  
Koma zulmetde gark it anı nûra
- 1116 Hakîkat bâdesine câme eyle  
Enâm içre nasîhat-nâme eyle
- 1117 Anı hıfz eyleyüp ehl-i hasedden  
Hasûduñ boynına habl it mesedden
- 1118 Benüm bu zâde-i tab‘um olupdur  
‘Îzârı havf-ı hâsidden solupdur
- 1119 Aña ta‘n itmesün her şahs-ı süflî  
Halâs it dest-i zâlimden bu tıflı
- 1120 İderseñ terbiyet fânî degüldür  
Baña ‘âlemde bir ölmez oguldur
- 1121 Tazarru‘larla el açup du‘âya  
Düşe kalka irişdüm bu araya
- 1122 Safer ayında bu zîbâ mecelle  
İrişdi evvelinden bu mahalle
- 1123 Bu sübha haytına ey merd-i hoş-hû  
Dizildi biñ yüz otuz dâne lü’lü
- 1124 İrişdi leyle-i sa‘ye sehergâh  
Tamâm oldu kitâb el-hamdü li’llâh